

萬 有 文 庫

第 二 集 七 百 種

王 雲 五 主 編

楹 聯 叢 話

附 續 話

(中)

梁 章 鉅 輯

商 務 印 書 館 發 行

大 館

萬有文庫

第一集七種

總編者

王雲五

商務印書館發行

楹聯叢話

附續話

(中)

梁章鉅輯

國學基本叢書

楹聯叢話

卷八

格言

章鉅少承庭訓。先資政公。每作書。必爲章鉅講明其義。嘗自署書室曰。四勿齋。謂無益之念勿起。無益之事勿爲。無益之言勿說。無益之物勿食也。每爲人書楹帖。必用格言。謂章鉅曰。人來乞書。而不以格言應之。卽所謂無益之事也。一日與先伯父奉直公。爲人分書楹帖。先伯父書一聯云。欲知世味須嘗膽。不識人情只看花。公亦書一聯云。非關因果方爲善。不計科名始讀書。呼章鉅語之曰。汝知此兩聯意義之深厚乎。汝伯父所書。乃涉世良方。我所書。乃自修要旨也。終身用之不盡矣。

通行楹帖有云。謙卦六爻皆吉。恕字終身可行。先資政公最喜述之。謂章鉅曰。此是經訓。非僅楹聯而已。又集四書語示章鉅曰。敏則有功。公則說淡而不厭。簡而文。此兩語。學古服官。淑身涉世皆宜。亦可當座右銘也。

余髫齡卽受業於孟瓶庵師。超然之門。師由吏部郎乞養歸里。時年方四十。掌鰲峰講席十餘年。終老於

家宅後有亦園亭。爲讀書靜坐之地。日以懲忿窒欲自課。製楹聯云。談性命則先賢之說已多。何似求之踐履。學考訂則就衰之年無及。不如返諸身心。

七修類稿云。宏治間。吏部尙書三原王公恕署門曰。仕於朝者。以饋遺及門爲恥。仕於外者。以苞苴入都爲羞。嘉靖間。藩司參議揚州錢公燦。亦自撰一聯。使所屬衙門皆帖焉。句云。寬一分民受一分。見祐鬼神。要一文不值一文。難欺吏卒。王之冢宰。近世難及。而錢忤當道。不久去。余謂二對近人不知。前乃真西山奏疏。後亦古語也。惜忘之。

楊文貞士奇有子爲橫於鄉。有密友自楚中來者。每述其惡款。文貞常戒之。一日書一聯示之曰。不畏官司。千狀紙。只怕鄉民三寸刀。毫不知改。後卒以事伏法。人謂文貞此聯。可爲巨族藥石。

呂新吾先生有銓署楹帖云。直者無庸我力。枉者我無庸力。何敢貪天之功。恩則以奸爲賢。怨則以賢爲奸。豈能逃鬼之責。又公署楹帖云。青天下鑒此心。敢不光明正直。赤子來游吾腹。願言豈弟慈祥。附見呻吟語治道門。

茶餘客話云。申梟盟滄光。自見蘇門先生後。大書於門曰。真理學從五倫做起。大文章自六經分來。又題書室聯云。學古之志未衰。每日必擁書早起。干世之心已絕。無夕不飲酒高歌。觀此。則飲酒高歌。正非易易矣。

桂林府之秀峰書院。爲嶺西人文萃集之區。乾隆間。武緣劉靈溪太史定道聯云。於三綱五常內。力盡一分。就算一分真事業。向六經四子中。尙論千古。纔識千古大文章。呂月滄山長稱之。余謂此卽從申臆盟真理學。從五倫做起。大文章自六結分來二語。衍而暢之耳。

吾閩之鰲峰書院。有林青圃先生題聯云。反己有真修。須留神檢到心身界上。加工無別法。務著力打開義利關頭。雅似先儒語錄。

王少湖敬臣云。有一先輩揭千字文爲齋室楹聯。而各加注焉。罔談彼短之下。注云。我亦有短。靡恃己長之下。注云。人各有長。此語吾人皆當服膺也。

湯文正公答沈荳岸書云。李文節嘗言翰林官能壞人。衙門冷則易苟。體面好則易傲。無政事則易懶。無風波則易放。署中堂聯云。人重官非官重人。德勝才毋才勝德。真座右銘也。

魏敏果公象樞。由左僉都御史。洊升戶部侍郎。一歲五遷。愈用警惕。自題一聯云。欺人如欺天。毋自欺也。負民卽負國。何忍負之。載年譜中。

柳南隨筆云。無錫杜紫綸太史詔。由詞館假歸。二十年林居。游名山殆徧。乾隆丙辰。游西湖歸。作一絕句。授其子曰。此卽我遺令也。未半月。以微疾終。詩云。半生空自逐浮華。放浪湖山亦大差。分付兒曹無別語。讀書爲善做人。卒之前三日。爲其七十誕辰。張宴廳事。大書一聯。榜於柱。出句爲教子課孫。完我分對。

句卽用所作詩結語云。

隨園詩話補遺載或題書齋聯云。無求便是安心法。不飽真爲却病方。又過潤州時。見僧壁聯云。要除煩惱須成佛。各有來因莫羨人。又過九華寺見一聯云。非名山不留仙住。是真佛只說家常。亦彼法中之格言也。

武進趙恭毅公申喬論學以不欺爲本。官浙藩時。自署堂聯云。君不可負。只是心難負。負心者不容於堯舜。天不可欺。誰言人易欺。欺人者如見其肺肝。又湖南院署聯云。但願民安若堵。何妨暑冷如冰。

姚雪門。督學湖南時。自題使院云。虧他人。便虧自己。須記朝蠹暮鹽。我亦寒士。要公道。還要虛心。試看畹蘭畝。蕙楚故有材。又聯云。才要真愛。名要略愛。總之己要自愛。天不可欺。君不敢欺。實於心不忍欺。吳稷堂。亦督學湖南。有聯云。畏簡書。並畏人言。常以無欺盟夙夜。正文風。先正士習。惟將有恥勗膠庠。吾閩沈心齋。誦學使一聯云。爾無文字當安命。我有兒孫要讀書。簡而有味。翁覃溪師督學山左時。亦錄此十四字。懸於堂楹。並爲之跋云。

江南各州縣廳事。多同一楹聯。據王朗川言行彙纂。乃王玉池令金鄉時所作。句云。眼前百姓卽兒孫。莫言百姓可欺。當留下兒孫地步。堂上一官稱父母。漫說一官易做。還盡些父母恩情。語質意真。妙在人人共曉。若堅瓠集所載胡可泉知蘇州。揭一聯于門外云。相面者。算命者。打抽豐者。各請免見。揆廳者。鋪堂。

者。撞太歲者。俱聽訪拿。則未免村氣太甚矣。

余初歷外任。卽守荊州。嘗於廳事漫題一聯云。政惟求於民便。事皆可與人言。石曉田郡丞照。逢人述之。未及一年。擢淮海監司。實筦河防。非所習也。因題廳事云。到此真成以政學。相逢但願由中行。萬廉山郡丞承紀。亦亟稱之。

金德山中丞。在粵西藩任時。作官廳對聯云。坐此似同舟。宦情彼此關休戚。須臾參大府。公事何妨共酌。商用意深厚。有名臣風味。余至粵西。訪其聯。已不可得矣。中丞復誦其鄉人徐公士林作臬司題庭柱云。看階前草綠苔青。無非生意。聽牆外鴉啼鵲噪。恐有冤魂。亦仁人之言。若宋牧仲題豫章署齋云。雲白峰青。煥發廬山真面目。蛟騰鳳起。挖揚滕閣舊風流。詞雖美而意近夸矣。

李恭毅公湖。任通永觀察時。題廳事一聯云。人苦不自知。願諸君勤攻吾短。弊去其太甚。與爾輩率由舊章。

聞廣州郡守署中一聯云。不要錢原非異事。太要好亦是私心。此所謂深人無淺語也。惜忘却何人所撰。陳最峰景登牧晉州。自題廳事云。頭上有青天。作事須循天理。眼前皆瘠地。存心不刮地皮。蔣南莊守潁州。自題廳事云。人原是俗非關吏。仕豈能優且讀書。陳子瀾尹來賓。亦自題廳事云。事出於公。諸君何妨至室。吏原非俗。我輩還要讀書。皆真樸有味。

余小霞題佐雜官廳聯云。此間只可談風月。相對何須問主賓。渾成典切。於佐雜官廳尤有味。

甘肅藩署官廳。有薩湘林集經語聯云。有孚在道。明功也。同寅協恭和衷哉。

桂林撫署二堂。有同年趙文恪公慎眇聯云。爲政不在多言。須息息從省身。克己而出。當官務持大體。思事事皆民生國計所關。文恪由桂林擢督吾閩。兩地皆有遺愛。至今頌聲不衰。讀其楹聯。堪信其言行相顧也。

桂林撫署小廳中。有百文敏公聯板云。行所常行。不爲己甚。慎之又慎。未敢卽安。跋云。此庚申歲。集古人語。以自勗者。余自京尹出膺外吏。所至不一載。必有遷除。以故湘南浙右。黔嶺滇池。次第轉徙。履任之暇。卽手書榜諸楹間。以爲座右之銘。去冬於五華薇署。甫刻此聯。翼日而拜粵西之命。涉歷愈深。策惕愈甚。請事斯語。殆將終身。以之爲封圻報稱也。可以之爲密勿陳謨也。嘉慶甲子。重書於桂林節署之懷清堂。

程梓庭祖洛撫吳時。於官齋中自書一聯云。醴泉無源。芝草無根。人貴自立。流水不腐。戶樞不蠹。民生在勤。又一聯云。無多事。無廢事。庶幾無事。不徇情。不矯情。乃能得情。

桂林呂月滄瑣郡丞。隨其父在戍所十五年。始赦歸。成進士後。觀政浙中。初知慶元縣。有大堂一聯云。我也曾爲冤柱。痛入心來。敢糊塗忘了當日。汝不必逞機謀。爭個勝去。看終久。害著自家。任奉化縣。有二堂

聯云。民心即在吾心。信不易孚。敬爾公。先慎爾獨。國事常如家事。力所能勉。持其平。還酌其通。梁山舟先生贈聯云。蒼生自是關吾分。儒者真宜做此官。

聞前明王文成公行部所至。必令二人肩二高脚牌前導。大書云。求通民情。願聞己過。議者以爲客氣。不虛也。吾友林少穆爲江蘇廉訪時。嘗書此作大門楹聯是矣。

余小霞乙庚筆記云。州縣每遇命盜案出。必有蠹役陰嗾所獲之犯。使供某某爲同盜。則皆素封且愚懦可魚肉者。被供者率以賄免。而役之囊充焉。謂之開花。四川某尉署中。有自撰楹帖云。若使子孫能結果。除非盜賊不開花。可謂惠出一尉矣。

吾鄉林青圃先生。歷官中外。亮節高風。一宅數畝外。囊橐無餘。余黃巷之舊居。卽先生故宅也。嘗自榜楹柱云。庭餘嘉蔭。室有藏書。天下事隨處而安。卽此是雕梁畫棟。卜得芳鄰。居成美境。黃巷又名新美境田舍翁問心已足。漫言應列鼎鳴鐘。

粵東黃翼堂紹統訓導石城。學者稱仰山先生。嘗自署楹帖云。爲倫類中所當行之事。作天地間不可少之人。

嘗見汪退谷先生書楹帖云。汲水澆花。亦思於物有濟。掃窗設几。要在予心以安。又梁山舟先生書楹帖云。能受苦。方爲志士。肯吃虧。不是癡人。

蔣心餘先生宅中大門聯云。一代翰林風月手。六朝蘭綺謝王家。聞是彭文勤公所贈句。其廳堂各聯。悉出先生所撰。皆格言也。大廳聯云。至樂莫過讀書。至要莫如教子。寡智乃能習靜。寡營乃可養生。內堂聯云。欣戚相同。爲人莫想歡娛。歡娛卽是煩惱。福命不大。處世休辭勞苦。勞苦乃得安康。饗堂聯云。富貴無常。爾小子勿忘貧賤。聖賢可學。我清門但讀詩書。又聯云。垂訓一無欺。能安分者。卽是敬宗尊祖。守身三自反。會喫虧者。便爲孝子賢孫。

紀文達師曰。門人耿守愚。喜與人爭禮數。常言士不貧賤。驕人則崖岸不立。恐益爲人所賤。余曰。此田子方之言。朱子已駁之。卽就其說而論。亦謂道德本重。不以貧賤而自屈。非毫無道德。但貧賤卽可驕人也。先師陳白崖先生。嘗手題一聯於書室曰。事能知足心常愜。人到無求品自高。斯真探本之論。兩言可以千古矣。

吳門故家廳堂有一聯云。必孝友乃可傳家。兄弟式好無他。卽外侮何由而入。惟詩書常能裕後。子孫見聞止此。雖中材不致爲非。不知何人所撰。訓詞深厚。常家家揭於堂楣。余小霞自述其舊居廳事聯云。兄弟睦。家之肥。子孫賢。族乃大。義亦闊。大。

廣州香山書院聯云。諸君到此何爲。豈徒學問文章。擅一藝微長。便算讀書種子。在我所求亦恕。不過子臣弟友。盡五倫本分。共成名教中人。

姚鐵松中丞守武昌時撰廳事聯云。筆下留有餘地步。胸中養無限天機。蓋因舊句而改首二字也。石天基傳家寶中有一聯云。言易招尤。對朋友少說幾句。書能益智。勸兒孫多讀幾行。真傳家寶也。相傳桂林陳文恭公自題其里第一聯云。惜食惜衣。非爲惜財緣惜福。求名求利。但須求己莫求人。或云是武進劉文定公綸所撰。然余嘗見梁山舟學士手書此對。又云是文衡山語也。

汪龍莊云。余治刑名二十餘年。行將從宦。甥蘭啓將事讀律。請業於余。因就疇昔所究心者。書以代口。題曰佐治藥言。並撤寓齋中舊聯授之。曰。苦心未必天終負。辣手須防人不堪。可謂仁恕矣。

彭文勤公少與蔣心餘同學。有題書房舊聯云。何物動人二月杏花八月桂。有誰催我三更燈火五更雞。今此聯熟於人口。而不知其爲文勤所製也。

丁自菴善慶督學粵西。誨人必先器識。而後文藝。自撰一楹帖鏤板。頒之庠序。句云。人生窮達豈能知。趁早須立此可爲聖賢。可對帝天之志。客告是非且莫管。得閒要讀我有益身心。有關世道之書。亦可爲士林鍼砭矣。

嘗見那文毅師手書贈顧藹亭工部聯云。鷹隼入雲。睽所向。驍騏得路。慎於平。工部蓋以才自見者。故曷之如此。宦途中客。皆當服膺也。

于文襄公敏中嘗治蔬圃。自題圃門聯云。今日正宜知此味。當年曾自咬其根。鄂文端公鄂爾泰亦有菜

圃長聯云。此味易知。但須綠野親身種。對他有愧。只恐蒼生面色多。用意各別。皆格言也。

近人集蘭亭序字作楹帖。有極自然成格言者。如與世不言人所短。臨文期集古之長。人有不爲斯有

品。已無所得可無言。盡日言文常不倦。與人同事若無能。一人知己亦已足。畢生自修無盡期。相

知當不在形跡。修己豈可殊初終。清言每不及世事。靜坐可以修長生。知足是人生一樂。無爲得天

地自然。每臨大事有靜氣。不信今時無古賢。與賢者游信足樂。集古人文亦大觀。信古不遷。也是

昔賢知己。流陰若寄。無爲今世閒人。又有集聖教序字者。如大本領人。當時不見有奇異處。敏學問者。

終身無所爲滿足時。又有集爭坐位帖字者。如修身豈爲名傳世。作事惟思利及人。大懼與衆人同

數。須知保晚節尤難。名美尙欣開過友。業高不廢等身書。業高乎衆意豈滿。澤及於人功不虛。

閱鶴初曰。嘗見一楹聯云。世間惟有讀書好。天下無如喫飯難。語亦沈著。惜未知作者爲誰。又桑葢甫先

生授徒。輒勸人加餐食。案側懸一聯云。放開肚皮喫飯。抖起神氣讀書。想見豪情。然不若徐連峰岱雲立

定脚根。撐起脊。展開眼界放平心。爲個儻有致也。記余嘗薄遊永嘉。謁陳觀樓先生。昌齊於署齋。見自書

一聯云。豎起脊梁立行。放開眼孔觀書。似更老氣無敵。

程月川中丞含章。每莅一任。必以自書大字墨搨一聯。懸挂廳事。蓋讀書志在聖賢。爲官心存君國。十二

字。款云。敬書朱紫陽夫子家訓語。按此是我朝崑山朱柏廬先生用純所撰居家格言。自黎明卽起。至庶

乎近焉。凡五百一十字。此其末段結語。通篇語皆切實。而此二句。尤爲賅括。允堪懸作座右銘。今人誤以此篇爲朱子所作。中丞亦未加深考耳。中丞又嘗書好鳥枝頭亦朋友。落花水面皆文章兩語。爲書室楹聯。旁亦注云。書朱紫陽夫子句。不知此乃南宋翁森所作四時讀書樂詩。並非朱子。中丞亦沿訛而不知也。

楹聯叢話

卷九

佳話

柳南隨筆云。嚴恪。字心萱。文靖公之父也。文靖公已晉尙書。而封翁猶康健。自書堂中一聯云。有子萬事足。我子作尙書。足而又足。七十古來稀。我年近大耋。稀而又稀。

松窗筆乘云。尤悔菴。著臨去秋波那一轉制義。流傳禁中。世祖知其爲徐立齋業師。因取觀之。歎爲真才子。及官翰林。嘗偕諸儒臣進平蜀詩文。聖祖見其名曰。此老名十。悔菴以此二語刻堂柱。左曰。章皇天語。右曰。今上玉音。極文人之榮。

王文成公之父海日先生華官至南京吏部尙書。致政時。值文成公平宸濠。先生自題書室一聯云。看兒曹整頓一作轉乾坤。任老子婆婆風月。如此福分。如此襟期。自當隻千古而無對。我朝桐城張文端公。及見子文和公晉揆席。自題門聯云。綠水青山任一作讓。老夫消磨一作遙歲月。紫袍金帶一作紫宸。黃閣看吾兒變理陰陽。正襲海日語。按海日語。又似從謝太傅對客語中化來。特不如其蘊藉。而張語則風味又減矣。

無錫嵇文敏公曾琦及文恭公父子相繼爲宰相。門聯云：王聖臣賢兩朝宏碩輔。父先子後一氣轉洪鈞。桐城張文端文和亦父子宰相。門聯云：二世三公太平宰相一堂五代富貴神仙。按我朝章平濟美者滿洲人爲多。惟尹文恪公尹秦尹文端公尹繼善慶文恪公慶桂三世蟬聯爲最盛。漢人則山左劉文正公統勳文青公埔及嵇氏張氏皆以父子相繼。此外無聞焉。記宋尤杞萬柳溪邊舊話載其家自文獻輝文簡裘科名接武嘗築圃西湖度宗幸其堂御筆題楹間一聯云：五世三登宰輔奕朝累掌絲綸朝野榮之。知盛事亦自古所僅見矣。

殷彥來嘗屢贈王漁洋一聯云：天下文章莫大乎是一時賢士皆從之游。其時亦惟漁洋足以當之。聞錢名世初游京師除夕以聯送漁洋云：尙書天北斗司寇魯東家。由是知名。後送權貴句云：分陝旌旗周太保。從天鐘鼓漢將軍。因之謫官。

科第世家以江南爲盛。我朝溧陽史氏崑山徐氏兩家祠堂長聯熟在人口。不但今世所稀。蓋自古亦罕遇矣。按史氏聯云：祖孫父子兄弟叔姪。四世翰苑蟬聯。猶有舅甥翁壻。子午卯酉辰戌丑未。八榜科名鼎盛。又逢己亥寅申。放溧陽史氏自康熙丁未史鶴齡始入翰林。至壬戌其子史夔繼之。庚辰其孫史貽直繼之。乾隆乙丑其姪孫史貽謨繼之。己酉其曾孫史奕簪繼之。此外則其壻金壇于小謝其甥于敏中。丹徒任蘭枝。陽湖管幹珍。並前後爲翰林。世謂海內無第二家也。若次聯所云。則史鶴齡爲丁酉舉人。丁未

進士。史夔爲辛酉舉人。壬戌進士。史夔之弟史普。爲己卯舉人。庚辰進士。史隨爲戊子舉人。己丑進士。史貽直爲己卯舉人。庚辰進士。史貽謨爲甲子舉人。乙丑進士。其弟史貽簡爲癸卯舉人。□□進士。又史鶴齡之曾孫史奕簪。爲己酉舉人。戊辰進士。史光啓爲壬申舉人。史應曜爲丙午舉人。八榜科名。彬彬可考。而合史光啓之壬申計之。實爲九榜。惟己亥寅三榜。尙闕有間。則末語又逢己亥寅申云云。亦尙須細考耳。

崑山徐氏祠堂聯云。教子有遺經。詩書易春秋禮記。傳家無別業。解會狀榜眼探花。按徐健菴尙書乾學。係順治甲午拔貢。庚子舉人。康熙庚戌探花。徐果亭閣學秉義。係康熙己酉舉人。癸丑會魁探花。徐立齋。相國元文。係順治甲午經魁。己亥狀元。並無解元會元榜眼。聯語亦不過渾括言之。然三兄弟並登鼎甲。並列崇班。不可謂非難能可貴耳。至上聯所云。語乃賈實可風。健菴尙書。著有讀禮通考。果亭閣學。著有經學識餘。立齋相國。著有含經堂集。而傳是樓藏書之富。甲於寰區。教子遺經。豈虛語哉。

徐健菴先生。以大司寇謝病歸。御書光燄萬丈扁。以寵其行。時人贈聯云。萬方玉帛朝東海。一點丹誠向北辰。

紀文達師曰。先師介野園先生。嘗四主會試。四主鄉試。其他雜試。殆不可縷數。嘗有恩榮宴詩云。鸚鵡新班宴御園。摧頽老鶴也乘軒。龍津橋上黃金榜。四見門生作狀元。于文襄公贈以聯云。天下文章同軌轍。

門牆桃李半公卿。可謂儒者之至榮矣。

溧陽史文靖公賚直七十壽辰。獻聯者充門。惟許刺史佩璜云。三朝元老。裴中令。百歲詩篇。衛武公。及袁簡齋先生云。南宮六一先生座。北面三千弟子行。爲公所許可。

乾隆末。漳浦蔡文恭公。予告歸里。小住福州。所主者爲余戚黨家。時余方齟齬。嘗從人於屏後竊覘之。記得先資政公言。有一客贈聯甚莊重切實。句云。主恩前後三旋里。天語丁寧再入朝。似是中朝達官所製。彼時但能述其語而已。不能舉其名矣。

乾隆六十年中。各直省奏報壽民壽婦。五世同堂。親見七代八代者。屢見邸抄。然未有如長洲蔣氏之盛者。乾隆丙申春。內閣中書應焞之祖文源。年九十。配張氏。年八十九。翰林院編修元益之祖文涵。年八十九。配顏氏。年八十八。俱五世同堂。親見八代。應焞元益。同日給假回籍祝壽。海內榮之。時徐兩峰巡撫。士林製聯稱祝云。登甲登科。七代兒孫繞膝。難兄難弟。九旬夫婦齊眉。洵盛事也。

嘗見劉文清公爲紀文達師書聯云。兩登耆宴。今猶健。五掌烏臺。古所無。蓋吾師自撰句也。梁山舟學士贈聯云。萬卷編成羣玉府。一生修到大羅天。

英煦齋師恩福堂筆記云。先文莊公。掌容臺者十二年。與達香圃。紀曉嵐。劉青垣。三宗伯同事。余於嘉慶庚申。追隨三先生。亦列春官。迨癸酉重任時。乃鐵冶亭。王春圃。兩先生爲大宗伯。秀楚翹。胡西庚。汪瑟菴。

爲少宗伯。鐵出王門。胡汪秀三公及余。前後皆出鐵門。其時有春官六座六師生之諺。因製聯留署。句云。典禮奉寅清。粉署重來。愧說箕裘延世業。同堂聚師弟。薪傳遞衍。始知桃李屬春官。按是年適爲王春圃先生八十壽辰。合署稱觴。屬章鉅爲儷體序文。中有官分兩座。座中以座主爲尊。賓列四門。門下之門生。疊至旬。時春圃哲嗣達甫先生。亦繼爲少宗伯。每對同官亟誦之。

恩福堂筆記又云。曹文敏公文植。以右庶子視學江西。適曹文恪公家居。獻一聯曰。韓愈官爲右庶子。莊周篇有大宗師。彭文勤公視學浙江時。杭州守爲邵公齊熊。公贈聯曰。杭州太守湖山美。康節先生安樂窩。皆可云典切。前輩於應酬文字。不苟如此。

梁文莊公詩正。旣相後。嵇文恭公贈聯云。秋圃黃花韓相國。春風紅杏宋尙書。臺閣頌揚語。又何其妍麗也。

山左劉文清公在相位。其太夫人九十壽辰。仁廟賜壽。備極恩榮。阮芸臺先生撰聯寄祝云。帝祝期頤。卿士祝期頤。合三朝之門下。亦共祝期頤。海內九旬真壽母。夫爲宰相。哲嗣爲宰相。總百官之文孫。又將爲宰相。江南八座太夫人。蓋其時文清以兩江總督。遙執相權。而信芳先生已官太宰也。此與崑山徐氏。溧陽史氏家祠中聯。皆無第二家足以當之。

直隸真定府試院後樓五楹。合祀關帝文昌。乾隆中。吳白華先生省欽視學。適奉召回京。代者卽令弟稷

堂先生在真定交替時。白華先生撰一聯云。文武一龜如在上。弟兄同節此登高。蓋恰值重九日。可云巧合。

慶蕉園宮保慶保爲廣東將軍時。王省匡尙書鼎贈聯云。恩衍章平。祖父子孫三宰相。家傳忠孝。弟兄叔伯四將軍。巨製鴻題。足以稱其家乘。

揚州喬椿齡。字樗友。善易數。雖至友不輕爲卜。詩文之格。唐以下不屑仿也。其弟子阮芸臺先生已貴。未嘗通一札。及先生視學山左。禮請衡文。乃往。卒於青州。嘗榜其齋云。四方名士皆知已。八座門生正少年。英煦齋師六十壽辰。適近七夕。有呈壽聯者。最著稱人口。而忘却何人所作。句云。四海仰雙星。六秩衍大撓甲子。二難躋八座。九天錫媧氏笙簧。時公子奎耀奎照。皆躋貳卿。內府錫樂部爲壽云。

阮芸臺先生五十歲時。在漕帥任。衍聖公孔冶山先生。贈以壽聯云。鼎甲連科。皆屬公門桃李下。淮揚列郡。更開軍府梓桑間。蓋先生揚州人。正漕帥轄下也。

阮芸臺先生於道光十八年。以大學士引年予告。返居廣陵里第。瀕行。奉恩諭。有怡志林泉之語。舉朝羨之。潘芝軒相國贈聯云。四海具瞻。尊爲山斗。同朝欽羨。望若神仙。

吳興沈均堂世楓。由湖北方伯告歸。其子希人學士官內閣。亦請假歸省。有同人以聯贈行云。鶴鳴在陰。其子和。鴻飛遵渚。我公歸。

朱建三生於七月七日。所居之里名百花巷。李笠翁壽以聯云。七夕是生辰。喜功名事業從心。處處帶來天上巧。百花爲壽域。羨玉樹芝蘭繞膝。人人占却眼前春。

笠翁五十歲生男。自題楹聯志喜云。一生好事無雙日。百歲閒身得半時。

康熙間。有某相國家。擅園林之勝。相國亦雅有文望。李笠翁贈之聯云。朝罷獨行春。踏去不知三徑遠。公餘時讀史。坐來便覺五雲多。

李笠翁贈李坦菴相國聯云。名世天生五百年。爲福黎民。特使早居黃閣上。元老人稱二十載。宜增華髮。誰知正在黑頭時。蓋相國年未及三旬。卽登揆席也。

李笠翁有壽方太夫人七十聯。自爲之序云。夫人爲何芝嶽相國之女。方坦菴宮詹之配。樓岡學士。邵村侍御。與三執四世五孝廉。暨謙六任子之母。茹齋奉佛。兼禮列仙。句云。出宰相之門。入宮詹之室。居學士侍御孝廉胄子之堂。足不履民家戶闔者。七十年於此。繼麻姑之跡。追王母之蹤。證如來觀音文殊普賢之果。口偏食人間烟火者。八千歲猶然。

又壽陳太夫人八十聯。自爲之序云。此蕉鹿先生之母也。時晝錦歸來。專爲稱觴一事。太夫人七十時。令子猶爲外吏。今則內擢司農矣。句云。踰古稀又十年。喜當時令子高遷。幾度錦衣歸閨闈。去期頤尙廿載。看後茲文孫繼起。滿堂牙笏頌岡陵。

梁文莊公乞假養親。賜萊衣。畫永四字扁額。又賜詩云。翻祝還朝晚。卿家慶更深。天語肫摯如此。可謂備極恩榮。稽文恭公贈聯云。花宴瓊林。溫仲舒由大魁秉政。堂開畫錦。王文獻以宰相養親。亦莊麗得體。無錫鄒小山宗伯一桂。有門生某。弟兄皆詞林。二子並登甲科。而其母則以側室受封者也。七十誕辰。求公撰壽言。公令諸門生擬之。俱不稱意。蓋不難於頌揚。而難於得尊者之口氣也。公乃自撰聯句云。有子有孫。都成名進士。多福多壽。是謂太夫人。於是執筆者咸歎服。又張船山太守問陶爲吳穀人先生錫麒之太夫人撰壽聯云。惟善人現壽者相。有令子爲天下師。亦質樸有味。時先生方爲國子祭酒也。

隨園詩話補遺云。乾隆庚寅。余在杭州。訪蔣荏生太史。聞寓湖州。太守張公處。卽具名紙往投。蔣未見。乃先有一峩冠者拱出。心知是太守。素無交。而其意甚親。未免愕然。太守笑曰。先生不識我耶。我早識先生。並識先生之夫人。貌作何狀。令姊。貌作何狀。歷歷如繪。余益驚問故。太守曰。當年公作翰林。住前門外橫街。我年九歲。與公陸氏二甥。同在蒙館讀書。每放學後。嬉游公家。公姊及夫人梳頭常在旁。手進梳篋。公過。納呼餅餌啖我。公竟忘耶。余謝曰。事實未忘。不料昔日聖童。今爲公祖也。惜二甥早亡矣。相與唏歔者久之。從此遂別。更二十年。太守之子惠堂孝廉。來權知溧水。又是余改官江南第一次捧檄之所。重重春夢。思之惘然。其前事迹。已作古詩一首。贈蔣梓入集中矣。今年衰不能再贅。乃作一聯。留惠堂廳事云。後我卅年。同爲此地親民宰。通家兩代。曾見而翁上學時。蓋質敝平生佳話。非敢挾長也。

梁山舟學士。於嘉慶十六年冬。患髮疽。危篤中。見有人持楹帖入。其句云。萬里烟雲開瘴戶。一天風雨護神鎰。病遂愈。因自號新吾長翁。後九十誕辰。夫婦齊眉清健。張岐山問萊贈壽聯云。人近百年猶赤子。天留二老看元孫。時人稱其工切。

梁山舟學士。最工爲壽聯。得之者。無不樂其雅切。如壽吳太夫人八十云。八座起居。令子宮袍慈母綫。重闌燕喜。南陽仙菊北堂萱。自注。令子方開藩河南。故用南陽菊事。又壽嵇文恭公八十云。螭均舊齒符天壽。鴈塔新題冠佛名。時公以萬壽年生日。重宴瓊林也。又壽王述菴侍郎昶八十云。盾鼻弓衣。行世文章。皆事業。屏風團扇。還山官府卽神仙。又壽許小范六十云。甲子從頭開上壽。神仙自古有曾孫。時許已有曾孫也。又壽趙次乾云。東方先生善諧謔。南極老人應壽昌。又壽汪西灝沅云。國門舊價千金重。鄉社新岡九老尊。又壽博羅蘇明府云。曾翻李委南飛曲。曾領朱明大洞天。又壽博羅成明府云。鼓琴自擅寰中手。飛鳥來看海上山。又壽姚宗伯是年與千叟宴者云。履鳥殿庭千叟上。台光角亢兩星間。又壽陝西何中丞未及年而與千叟宴者云。家傳玉節仍分陝。天賜瓊筵預杖期。又壽袁簡齋先生云。藏山事業三千牘。住世神明五百年。又壽直隸梁制軍云。旌麾幾句尊宗袞。杖履耆英壽國楨。又壽閩中丞奉使本籍讞獄者云。玉節承天南斗靜。錦衣行晝使星明。又壽尹文端之子爲福州將軍者云。龍門世澤華附盛。鯨海威名草木知。

廣東馮潛齋成修。幼牧牛。夢有持扇爲障日者。扇上有貴州學政四字。因奮志讀書。年三十四。始遊庠。逾年登賢書。聯捷成進士。由庶常改部曹。典蜀試。又典閩試。嗣督學貴州。旋罷歸。好論文。有馮八股之目。年九十餘始卒。乾隆壬寅八表。與夫人同庚。康健無恙。屆結褵周甲之期。親友門生。駢集稱慶。車行花燭。交拜之禮。自署門聯云。子未必肖。孫未必賢。屢忝科名。只爲老年娛晚景。夫豈能剛。妻豈能順。重諧花燭。幸邀夫眷。錫遐齡。至乾隆壬子。重赴鹿鳴。洵美談也。

趙甌北先生。早賦歸田。不與外事。惟以著作自娛。劉石菴先生手書贈聯云。務觀萬篇。半皆歸里作。啓期三樂。全是達生言。趙得之甚喜。

顏魯輿伯蕭。巡撫滇南。署堂聯云。彩雲見處。先後六十年中。三世建牙。宜何如効涓埃。以肯堂構。淇露承來。縱橫八千里外。百蠻稽首。所願與興禮讓。而廣農桑。王霞九觀察贈芳云。出語公自紀實。殆黔國公所僅見者。

廬陵劉古菴。上舍宗輝。買舟滕王閣。爲舟子書聯云。有客臨舟懷帝子。何人下榻學陳公。時商邱陳望之。江西巡撫見之。笑曰。奇士也。命延之入。且曰。爲君下榻矣。一聯之遇合亦奇。

陶雲汀宮保。開府大江南北者。十有餘年。名位兼隆。吏民翕服。潘功甫舍人。有祝五旬壽聯云。能文翰林。能言御史。能任封疆贊翊聖化。有真經濟才。公論出朝士口。爲國籌運。爲民興利。爲我鄉里表彰賢達。得

大光明壽妙法現宰官身。又齊梅麓太守祝六旬聯云。八州都督。五柳先生。經濟文章。千古心傳家學遠。六甲初周。一陽來復。富貴壽考。百年身受國恩長。蓋宮保誕辰。在黃鐘之月也。又程春海侍郎寄贈一聯云。海涵地負之才。文章博辨。議論雄偉。春溫秋肅之政。動用縣解。靜專直方。合諸名流之語觀之。其人之生平可定矣。

歙縣曹文正公。由戶部侍郎晉工部尚書時。其門下士徐訪巖廉訪資森贈聯云。再世宮銜。太保少保。兩朝宸眷。司徒司空。

楹聯叢話

卷十

挽詞

秋雨菴隨筆云。挽聯不知起於何時。古則但有輓詞。卽或有膾炙人口二句者。亦其項腹聯耳。惟石林燕語載韓康公得解過省殿試。皆第三人。後爲相四遷。皆在熙寧中。蘇子容輓之云。三登慶曆三人第。四入熙寧四輔中。此則的是輓聯之體耳。

恩福堂筆記云。紀文達師。輓朱笥河先生一聯云。學術各門庭。與子平生無唱和。交情同骨肉。俾予後死獨傷悲。二公所學。具見於此。而語尤真摯。且非笥河先生不能當斯語。非文達師亦不敢作斯語也。

恩福堂筆記又云。乾隆戊戌。余隨侍先文莊公赴閩撫任。道出杭州。值先文莊公六十壽辰。中丞學使。分日爲賀。此余得瞻彭文勤公之始也。迨余入詞垣。適公爲大教習。勗余曰。向讀之經書。不可拋荒。已讀之詩文。仍未足用。應將文選及唐宋詩醇文醇。盡卷熟讀。可爲好翰林矣。余因是加勵。迨嘉慶壬戌。遂與公同掌院事。一日公告余曰。內子昨問新院長爲誰。答曰。乃曩在杭州。汝亦見過甫八歲之英世兄也。二老

同深嗟歎。故癸亥公捐館時。余哭之痛。獻聯云。榕嶠奉行輿道。出臨安。絳帳摠衣纔八歲。蓬山陪末座。職猶弟子。玉堂撰杖忽千秋。蓋紀實也。

紀文達師輓劉文正公統勳聯云。岱色蒼茫衆山小。天容慘淡大星沈。句奇語重。非文正公不足以當之。成親王輓福文襄郡王福康安聯云。大名諸葛身先死。異姓汾陽帝不疑。我朝以異姓封王者。如定南王孔有德。義王孫可望。靖南王耿繼茂。襲義王孫徵淳。平南親王尙可喜。海澄公贈王爵黃芳度。皆在國初年間。雍正乾隆以來。惟福文襄一人而已。

福郡王薨於湖南軍營。時苗疆所在建祠。紀文達師撰聯云。汾陽王名位相同。功業常新。萬里有將軍壁壘。忠武侯經綸未盡。英靈如在。百蠻拜丞相祠堂。

彭春農曰。先文勤公出董文恪公那達之門。嘉慶丁巳。文恭公諧丁太夫人憂。高廟遣官奠酒。加賞陀羅經被。文勤公輓聯云。心愴老門生。執饋縫衣憐雪立。恩醴賢宰相。齧卮經被報春暉。時紀文達師亦文恪門生。輓聯亦以老門生與賢宰相作對。歸語其孫薌林曰。惟我兩人。所見略同也。

董文恪公之夫人沒於京師。時文恭公已登揆席。文達師作輓聯云。富春江萬古青山。阡表長留。慈訓能成賢宰相。聽雨堂九年絳帳。食單親檢。舊恩最感老門生。桃符綴語載此聯。以爲陶太史撰。蓋誤。

紀文達師因誦某詩云。浮沈宦海如鷗鳥。生死書叢似蠹魚。戲謂此二句。可作我他年輓聯。劉文清公云。

此惟陸耳山副憲足以當之。未幾而陸訃至。蓋方被命赴瀋陽覆校四庫書。以天氣驟寒。裘衣未到。凍僵於旅寓中也。時以爲語識。

紀文達師輓彭文勤公聯云。包羅海嶽之才。久矣韓文能立制。繪畫乾坤之手。惜哉堯典未終篇。蓋文勤方專司高廟實錄。藁本未能竣事而薨也。

沈歸愚尙書德潛輓桑弼甫調元云。文星酒星書星。在天不滅。金管銀管斑管。其人可傳。

畢秋帆自營生墟於鄧尉山。並自作輓聯云。讀書經世卽眞儒。遑問他一席名山。千秋竹簡。學佛成仙皆幻相。終輸我五湖明月。萬樹梅花。

昌平陳紫瀾宮詹浩。與錢唐陳甸山太僕兆崙。並負重名。時有南北二陳之目。宮詹有輓吳湛山中丞。士功聯云。使節轉閩疆。舊雨追思。鄂渚蘭言如昨夢。耆英推洛社。生芻遙奠。謝庭玉樹總層霄。中丞爲香亭侍郎之父。曾撫吾閩。與宮詹爲摯好。此聯淒婉動人。寫作雙美。侍郎爲裁截成卷。徧徵同人題識。新建曹文恪公。仁和胡文恪公。富陽董文恭公。及吳白華緒筠。心廷璋。陸費丹。叔舞。謝蘊山。啓昆。諸公。皆有跋。以一聯而集成巨觀。蔚爲墨寶。宜中丞之孫紅生舍人葆晉。珍祕若球璧矣。

梁山舟學士所撰輓聯極多。茲擇其尤著者錄之。輓梁文定公國治云。天北掩台垣。聞說槐音中夜斷。江東失宗袞。心傷荊樹一時摧。時其弟冲泉亦沒也。輓其姑夫張藻川侍郎云。朝無諫草家有賜書。卅載清

聲光簡冊。公應騎箕。我悲陟岵。一時血淚灑葭葦。輓藍素亭河督云。帝畀以河。三策勤勞著淮北。臣心似水。四知風節。媿關西。輓錢竹汀宮詹云。名在千秋。服鄭說經劉杜史。神歸一夕。仙人骨相宰官身。

錢韓石先生載。以上書房侍郎致仕。山舟學士輓以聯云。青宮授几。洛社圖形。官府神仙皆慧業。達尊備

三。絕藝擅四。儒林文苑並傳人。自注云。昔人以文與可騷書詩畫爲四絕也。

山舟學士之妹夫湯畫人。辛未庶常。未及散館而沒。年僅四十。生母猶在堂。學士輓以聯云。四十年生有自來。身到蓬瀛天遽召。三千里沒而猶視。心傷桑梓母何依。又輓其師莊對樵云。孝思盡宦海家園。榮親養親。一笑生天證佛果。道望齊太山梁木。吾仰吾放。幾人入座哭春風。又輓陶篁村云。萬里兒啼。此日愁攀賢令轍。卅年老淚。隔江空盼少微星。時篁村之子。方宦黔中也。輓其兄春淙云。一品承恩。魂魄長依華屋。九重念舊。馨香宜徹幽泉。輓明中和尙云。畫裏傳衣。夙契偶同永長老。山中獻蓋。前塵誰證衲禪師。自注云。余畫過去僧像。師爲補衲。又師與先人同入詩社。輓佛裔和尚云。竹萎蕉枯。此日是師真面目。焚香灑水。當年惟我舊朋儔。自注。次句指恒公寂時事。

山舟學士輓孔谷園。聯云。臨去詩成。寫照髯仙。明月清風人已遠。平生墨妙。瓣香冰叟。虹樓瀛海世爭傳。自注。谷園沒之前數日。有題蘇尺牘詩。明月清風。卽詩中語。天瓶居士張文敏公爲谷園婦翁。玉虹樓。谷園齋名。瀛海仙班帖。天瓶書也。

邱南屏侍郎樹棠。以事降調。未補官而卒。時辛卯上元日也。是日值月食。彭春農以聯輓之云。大雲暫作
閒雲。風規自在。元夜頓成長夜。月魄同虧。

陳荔峰侍郎。爲內閣學士。閱二十年。始擢少宗伯。旋攝少宰。少農。駸駸乎大用矣。以病乞假。調理已就。痊
愈。是日。讌客至中夜。衆賓甫退。始就寢。不逾時起坐。咯血數口而沒。彭春農輓聯云。撒手了無難。夜宴方
闌歸碧落。傷心將大用。夕陽雖好近黃昏。

平湖吳臺卿顯德。松圃協揆之猶子。山舟學士之甥也。幼聰敏。年十六。受知於朱文正師。補博士弟子員。
才藻冠時。謂取青紫如拾芥矣。乃十上鄉闈。未離席帽。鬱鬱不得志。遂遁而學仙。日從事乩鸞。叩長生之
術。年未四十。以瘵卒。太夫人猶在堂也。學士輓聯云。天道何知。不許阿嬭留李賀。神仙安在。翻教老淚哭
羊曇。讀之令人酸鼻。

山舟學士。與其德配汪恭人。俱登大年。恭人長學士一歲。先學士二年卒。學士輓聯云。一百年彈指光陰。
天胡靳此。九十載齊眉夫婦。我獨何堪。逾二年。學士始卒。年九十三。沒前數日。手書訃稿。遺命不治喪。不
刻行狀。同里衆紳士輓聯云。朵殿奉絲綸。四百紙述事記言。史館猶傳大手筆。明湖思俎豆。九十載清風
儉德。邦人長想古衣冠。

鮑覺生先生桂星。才氣冠時。徒以傲兀凌人。爲世所嫉。臨終自撰輓聯云。功名事業文章。他生未卜。嬉笑

悲歌怒罵。到此皆休。遺命懸於靈几之前。則仍是本色語也。

浙中蘇子齋釋。由翰林改官侍御。以公過。鐫級。捐復刑部副郎。轉正郎。出守山西朔平。以憂歸。起復。守山東青州。卒於官。有素交官於廣東者。聽其訃。痛之。寄聯輓之云。譽美西清。望重西臺。又威肅西曹。出治懋勳。猷兩省春風。思太守。耗傳東浙。心傷東魯。奈身羈東粵。招魂長歎息。一江秋水哭先生。

徐秋崖孝廉廷煊。於會試場中得病。十四日而沒於邸舍。時令嗣訪齋。亦以會試隨侍京寓。封翁來若先生。年八十。猶在堂也。梁小槎比部。輓以聯云。十四日病莫能興。幸喬梓相依。屬纊尙能親含玉。三千里沒而猶視。痛桑榆垂暮。倚閭猶自盼泥金。

道光乙酉。德清徐倪氏之案。自巡撫以至典史。一城之官。盡望吏議。王小華廉訪。惟詢以急欲平反此案。遂至自裁。蔡生甫學士之定。輓以聯云。剛毅木訥近仁。生原無忝。聰明正直而一。沒則爲神。頗肖其爲人。然以三品大員。爲此無名之死。論者惜之。

許周生駕部宗彥。病中語人云。夜來曾作詩。記得二句。頗切近狀。句云。厭聞家事常如客。愛看名山悔不僧。今繙鑑止水齋集。無此二句。蓋偶得句而未成篇也。駕部沒前三日。自撰輓聯云。月白風清。其有意斗量車載。已無名。可謂了然於去來者矣。

秋坪新語。載紀文達公長子汝侏。中乾隆乙酉。孝廉。卒時。公甚爲之神傷。語客曰。今乃知因果之說。或亦

有之。蓋孝廉病絕而蘇者屢矣。忽一日聞其聲。宛山西人也。問故。曰某來索逋。茲已償清。仍欠若干。可亟焚楮鏹如數。當去。家人輩如言焚之。遂瞑。方環哭間。又蘇。張目曰。所乘馬後足顛蹶。弗良於行。可易一匹。則乘之去矣。衆茫然。公之三女哭告曰。誠有之。兄氣絕時。所焚馬。吾見其後足紙損。或即其故歟。因別製一具焚之。乃不復蘇。公於靈帷書一輓聯云。生來富貴人家。却怪怪奇奇。祇落得終身貧賤。賴有聰明根器。願生生世世。莫造此各種因緣。蓋孝廉素性揮霍。錢刀到手輒盡。又緣事被褫。公以其過不檢攝。禁弗使出。日給資用。無小溢。孝廉深苦其拘。罄所有付之質庫。卒之日。蓋不餘一物云。

紀文達師與龔匏伯先生禮身同校四庫書。最相契。後先生以軍機章京觀察滇南。終於位。師寄輓聯云。地接西清。最難忘樞密院旁。公餘茶話。恩深南徼。惜空留昆明池畔。去後棠陰。

彭文勤公輓鍾碧溪大令聯云。匪特薦蘿親。髻同筆研相將老。空懷松菊志。家少田園竟不歸。

粵東張儀坡庶常翱。恃才放蕩。未及三十。卽以酒色殞其生。其師花曉亭方伯杰。甚憫之。輓以聯云。與人何尤。可憐白髮雙親。養子聰明成不幸。自古有死。太息青雲一瞬。如君搖落更堪悲。

余撫桂林。延呂月滄郡丞。主秀峰書院講席。士論翕服。余常就諮地方利弊。兼以政暇談藝。皆獲益良多。惜其驟歸道山。繼主講者。爲黃春亭邑侯。喧亦佳士。有輓呂聯云。德合荀君。久以範模孚梓里。文追白傅。豈惟政事在。杭州爲時所稱。余旣爲撰墓志。亦輓以聯云。三管失斯人。癸水辰山都闔淡。千秋存定論。鄉

賢名宦佇馨香。蓋月滄品學俱優。曾官兩浙。有循聲。尤長治獄也。時合省之士大夫。以請祀鄉賢祠環。余已爲擬定疏稿。適同官有違言。遂閣不行。亦可歎矣。

盧厚山宮師。嘗總督兩廣兩湖。巡撫江南山西。觀察廣東山東湖南。又於丁憂伏處時。奉特旨起家。管西域軍需局。駐劄肅州。凱撤後。遂巡撫陝西。其沒也。由宮保晉宮師。加輕車都尉世職。諡敏肅。余甲寅同年。中勳名之盛。未有如公者也。裕魯山廉訪裕謙。寄聯輓之云。曠典邁千秋。帶礪台衡。天錫殊綸榮衛霍。仁恩周十省。韜鈴黼黻。人從華屋仰皋夔。

劉星槎司馬台斗。寶應名進士也。由水部通守烏鎮。以督運終於官。舒白香哭以聯云。學究天人。祇曾博文章一第。才堪公輔。僅試官丞倅三年。

同年李服齋廉訪文耕。雲南人。由山左縣令起家。清節循聲。上達宸聰。不數年。遂秉臬齊魯。移官黔中。以老病引退。終於家。余壬戌同榜中。不乏俊異之才。而言坊行表。必推公爲巨擘。詢之滇人士。亦無間言。王孚遠方伯輓以聯云。道學風高。望推南詔。循良績著。念切東人。方伯山左人。故抒其去思如此。

四川李墨莊太史鼎元。客死揚州。貧無以斂。吳山尊輓以聯云。百金囊盡揚州死。萬里魂歸蜀道難。

鄭雲軒孝廉天衢。與余同肄業鰲峰書院。復同舉甲寅恩榜。實余之妻叔外舅。鄭蘇年師之弟也。甫踰四十而沒。時節母廖太孺人尙在堂。師哭以聯云。緣盡先離。傷心冊載荆枝。漫說來生還有約。事多未了。回

首七旬萱蔭。敢言已死便無知。一字一淚。情深於文矣。

徐兩松中丞。嗣曾撫閩。有惠政。其培植鼇峰書院士子。尤繫去思。聞其易簀前數日。自撰輓聯云。仗我佛慈悲指示。方悟得無我無人。做吾儒切實工夫。巴結到而今而後。可謂了然於來去者矣。

薩檀河邑侯玉衡。雄於文。尤工詩。皆不屑拾人牙慧。嘗爲一縣令之母輓聯云。民是賈兒。甘棠歌衆母。母官真佛子。妙蓮現法身。可云別致。余嘗借以應一達官之求。遽遭齒冷而置之。

紀文達師。於乾隆癸未甲申間。督閩學。時余家自先大父及先嚴。暨諸伯父叔父。皆及門受業。師訪知余家自前明以來。十五代秀才相繼不斷。特書書香世業一扁爲贈。先資政公因製堂聯云。近承十五葉囊箱。闡發金書玉宇。遙印千乘侯矩矱。優游聖域賢關。千乘侯爲聖門七十二賢。叔魚公鱣封號。實吾家遠祖也。余於嘉慶壬戌成進士。適又出文達師之門。一門三代。皆爲門生。皆登詞館。師每對人舉爲美談。是秋聞先資政公之訃。設位於京邸。師親來拜奠。並手製輓聯云。十五傳蘭玉相承。授硯三看入芸館。六千里泥金甫報。撫楹一笑返蓉城。

道光乙未入都。以所撰樞垣紀略。質之長懋亭公相。公閱之甚喜。爲辨析疑滯數事。且爲述乾隆年間樞直舊聞。娓娓不倦。蓋是時軍機老輩。無有在公之前者。丙申再入都。見公益矍鑠。堅坐久談。有後生所不逮者。因叩公調攝之方。公笑曰。十年前有星士相我。將來名位。可及阿文成。惟年壽少遜耳。文成年八

十一。今我已七十九。雖嬰鑠。又可恃乎。余以他語解之。而公果於次年元旦告終。聞除夕。向家人查詢。歎縣曹文正公終於何日。衆對曰。正月二日。公曰。我不可居其後。逾日遂逝。故徐星伯松輓聯云。易簣預知時。一日期先曹太傅。蓋棺先定論。千秋名並阿文成。時余在桂林。接公訃書。亦寄聯輓之云。出將入相垂五十年。功比汾陽。壽同潞國。掃穴犁庭。越三萬里。昔追定遠。今媿章佳。亦紀實也。

彭春農曰。曹文正公自勝衣。卽受業於先文勤公。故與賓從談時。輒舉文勤公詩文言行。以示後進。諸君皆以爲聞所未聞。公之沒也。賜諡之旨。專舉睢州湯公。大興朱公作配。予輓公聯句云。帝眷老成人。直追溯昭代前賢。當之克配。師承先大父。從此問昔年遺事。知者其誰。上聯舉國恩之大。下聯述私交之密也。彭文勤公有女。許字同里曹文恪公之子。曹氏子殤時。女年甫十齡。卽矢志守貞。生平究心經傳。不似閨秀之僅以詩文表著者。文勤公病篤。曾割股以進。故奉仁廟特旨旌獎。誠異數也。未幾遂沒。劉金門先生輓聯云。名父名翁名女士。大貞大孝大完人。

余秋室學士集悼亡聯云。濟艱辛。嘗險阻。貧家婦信難爲。痛今朝鏡破釵分。欲圖夢影重圓。除異世再同青玉案。習荆布。厭綺羅。半生儉應可法。奈塵海颿馳電掣。贏得褶痕如舊。到秋宵怕檢縷金箱。哀怨纏綿。不愧才人之筆。

黃蕉卿巽。錢唐梁紹壬之室。隨梁入粵。間關渡嶺。未及半年而沒。梁輓以聯云。四千里累爾遠來。父在家。

母在殯。翁姑在堂。屬纊定知難瞑目。廿三年寒余永訣。拜無兒。哭無女。繼承無姪。蓋棺未免太傷心。蕉卿有聽月樓詩。不減慧業文人。宜紹壬之有餘痛也。

靖安天香居士舒夢闌。字白香。負才名。其配李湘絃。亦婉慧。有才子佳人之目。李以中秋夜化去。白香悼傷甚至。所作秋心集。中有輓辭錄一篇。稱堂中輓聯。以隳西原太守爲最。句云。仙去何之。燒鼎白雲。棲斷壑。神傷已甚。著書黃葉。冷空山。真才子筆也。又載陳果堂聯云。千佛禮鳩摩。名士案頭。賡味旦。五更驚蛻羽。天香館畔。咽秋風。胡果泉中丞聯云。蟾鏡掩清輝。歎當年玉宇瓊樓。難覓靈丸。延壽藥。鹿車隨大隱。知此後。故盜遺掛。重哦寒夜。悼亡詩。劉星槎司馬聯云。家有詩仙。惜到處名山。未能偕隱。身常禮佛。覺往生淨域。確有明徵。吳蘭雪中翰聯云。奔月訪姮娥。忍令天香。虛舊館。持花歸淨土。徒煩松雪。禮中峰。汪巽泉學士聯云。仙娥明月是前身。想歸真翠水丹林。桂蕊靈香同郁烈。名士秋風添別恨。漫寄意繩床經案。蟲絲落葉共淒清。皆名筆也。

韓芸舫中丞克均。巡撫吾閩。其夫人以四月八日。卒於官廨。僚屬公輓。多頌揚語。先生俱不愜意。惟孫平叔督部一聯云。解脫拈花。剛佛日。證明因果。在仙霞。韓見而歎曰。畢竟名士吐屬。與衆不同。

余由蘇藩引疾假歸。後一年。卽遭亡室鄭夫人之痛。百事俱廢。不但悼亡詩不能成一字。並輓聯亦無之。惟手書影徂心在四字於靈帷而已。憶程春海侍郎寄聯云。淑德稱女師。孝著鄭經。禮修梁案。令名相夫。

子澤流三黨。絮被萬家。語特矜重。足令泉壤生輝。又林少穆撫部寄聯云。相夫垂四十載辛勤。出處同心。畫錦歸來猶並轡。濟世具萬千緡功德。熾昌啓後。夜臺化去合生天。則隱括余行狀語也。又門人祝秋臺侍讀春熙長聯云。千里葦蕩。方偕歸隱。三間茆屋。幸免賃舂。卅八載鴻案相莊。痛半世釵荆。彤史遽亡賢德。曜鑑罄才思。葭末心欽。書帶家聲。蘭猷耳熟。廿六年鯉庭陪侍。對後堂絲竹。絳帷望斷老彭宣。亦紀實之詞。尙非輓聯俗套。

陶雲汀宮保。由徽撫蘇撫。晉督兩江。前後將二十年。以勞瘁終於金陵。賜諡文毅。入祀賢良祠。余壬戌同年中。勳名之盛。未有如公者也。卓海帆尙書秉恬。哭以聯云。天下大事公可屬。江南遺愛民不忘。京中同人。皆以爲切當。余亦寄聯輓之云。尹文端厚澤深仁。重見江鄉說遺愛。陳恪勤精心果力。方知楚產信多才。蓋宮保狀貌雄偉。方口豐髯。酷似其鄉陳恪勤公。余藩吳日。因修陳公祠。拜像而知之。曾紀以詩云。省識鬚眉如有悟。始知從古楚才優。宮保聞之。亦頗自喜。此聯猶前詩意也。

朱詠齋太宰士彥。亦余壬戌同年。一生以樸誠爲上所倚任。其直上書房時。尤以嚴氣正性自持。斷斷辨論之聲。達於中外。上在乾清宮時。每遙識之。比年奉命讞獄。周歷各省。不敢告勞。甫還朝。未久卽卒。賜諡文定。加宮保銜。可謂備極哀榮矣。余寄聯輓之云。師範重三天。警效聲猶留殿陛。皇華周四國。樸誠望早式班聯。無溢美也。

陳芝楣中丞鑾由鼎甲翰林出爲江南郡守。初權江寧府。補授松江府。旋調蘇州府。取白香山詩句。鐫一小印曰。自出承明三領郡。余藩吳時。芝楣適守蘇州。文采風華。傾其流輩。以於余有推薦之誼。執弟子禮甚恭。踰年。卽擢監司都轉。陳臬開藩。遂被開府豫章之命。旋移吳中。權江督兼河督。近科詞臣名場之快利。未有如公者也。聞其擢浙臬時。初覲京師。引對甚稱旨。有此後前程不可限量之褒。乃嚮用方殷。而修文遽召。年實限之謂之何哉。余以聯寄輓之云。儀表稱科名。帝許雲程難限量。文章兼政事。我慚風義託淵源。

哀輓通用之聯。亦有佳者。如悼亡云。春江桃葉鶯啼溼。夜雨梅花蝶夢寒。寶瑟無聲絃柱絕。瑤臺有月鏡奩空。總帷忍痛安仁句。椎髻難忘德曜風。戚友云。氣數不言仁者壽。性情猶見古之愚。誄文作

自先生婦。遺稿歸於後死朋。蘭亭少長悲陳迹。玉局風光歎化身。素車有客奔元伯。絕調無人繼廣

陵。雲深竹徑樽猶在。雪壓芝田夢不回。文章卓犖生無敵。風骨精靈沒有神。白傳事業已歸前輩

錄。典型留與後人看。坡公稱觴尙憶登堂事。挂劍難爲過墓情。十載名場成勁敵。九重泉路盡交期。

達官云。峴山碑墮羊公淚。浚縣圖留陸子型。處士云。桃花流水杳然去。明月清風何處游。上界由

來足官府。西風何處哭文章。墨雲香冷來禽館。薤露寒生賦鵬文。不作風波於世上。別有天地非人

間。又八字云。未弭前思頓作永別。追尋笑緒皆爲悲端。一代傳人鄭虔三絕。十年循吏楊震四知。

又十二字云。象應少微星。彩落蕭辰悲夜月。名傳耆舊傳。芳流梓里憶春風。小別遽招魂。始信憂勞能損壽。高堂久忘世。那堪遲暮轉摧心。叔輓姪云。別室具銅盤。期爾從容光素業。中庭摧玉樹。愁余遲暮哭窮途。兄輓弟云。同氣遽分途。原隰秋風魂不返。異時誰共被。池塘春草夢難通。兄輓妹云。勁節勵冰霜。定卜瀧岡終有表。衰年鮮兄弟。可堪雷岸更無書。甥輓舅云。有淚瀧州門。千古白眉增太息。無才成宅相。廿年青眼益酸辛。婿輓翁云。浮白自慚蘇子美。垂青空憶李文公。弟輓帥云。問字感當年。重謁元亭空灑淚。傳經珍此地。載瞻絳帳暗摧心。

曹濟原宮保文埴。於乾隆末。乞養里居。歿於嘉慶三年。彭文勤帥輓聯云。人爵貴。天爵更尊。解組學鳥巢反哺。帝星升。臣星先隕。騎箕爲龍馭前驅。

富陽董文恭公。身爲太平宰相三十年。曾兩次畫像紫光閣。勳名之盛。一時罕有倫比。而身後清況。乃似寒門。潘芸閣學士錫恩。有輓聯云。珠玉白天題。計兩番紫閣圖形。早有丹青傳相業。樓臺無地起。綜卅載黃扉翊化。惟將清白表臣心。

楹聯叢話

卷十一

集句集字附

漢碑句皆質重。蔚然古香。余齋所藏頗多。因偶集為楹聯云。蘭石之姿。清少之行。峻珪璋其實。芳麗其華。

燕平蹈規履信。立德隆禮。范根道核藝。抱淑守真。景佐時理物。天與厥福。夏承舍和履仁。帝賴其勳。

殘碑德惠旁流。鬯芳遠布。劉雅度宏綽。廣學甄微。晉敦詩悅禮。藐然高厲。耿勳琢質繡章。耀此聲香。

夏承紹聖作儒。貢登王室。孔鉤河摘洛。象與天謨。史學為儒宗。行為士表。晉冠乎羣彥。簡乎聖心。鄭

校官聲無細聞。雖遠猶近。張勞而不伐。有實若虛。孔純龢之德。仁義之操。魯孝弟於家。忠饗於朝。方舍

和履仁。天與厥福。見發號施憲。民說無疆。孔舍和履仁。見永享年壽。孔應期作弼。入參文昌。倉頡

下民康濟。順如流水。尹羣公憲章。穆若清風。衡温然而恭。慨然而義。婁忠以自勗。清以自修。鄭

近人集句楹帖。有可喜者。五言云。山公惜美景。小謝有新詩。獨即事已可悅。賞心還自怡。杜

脚著謝公屐。身披萊子衣。李名香播蘭蕙。妙墨揮巖泉。張江山助磅礴。文物照光輝。陸

光

深情託瑤瑟逸興橫素襟李賈至

閱古宗文舉臨風懷謝公盧綸

跌宕孔文舉風流賀季真光

發李

誰將佳句並真與古人齊李楊巨源

雅琴飛白雪逸翰懷青霄杜正倫

智勇冠當代卓犖觀羣

書盧湛

結交指松柏述作凌江山李孟浩然

朗抱開曉月高文激頽波孟郊

學業醇儒富文章大

雅存韓愈

積照涵德鏡素懷寄清琴孟郊

鵬鷲勵羽翼龍鸞炳文章李光義

草木含清色巖廊

挹大猷高適

知音在霄漢高步躡崑崙孟浩然

江山澄氣象冰雪淨聰明杜甫

汲古得修綆開

懷暢遠襟韓愈

文章輝五色心跡喜雙清李甫

端居喜良友獨立占古風孟郊

披雲鍊瓊液坐

月觀寶書李翠玉

聲華滿冰雪節操方松筠高適

酒香留客住詩好帶風吟白居易

名香播蘭

蕙雕藻邁瓊瑤岑參

蘊真愜所遇振藻若有神杜甫

溪靜雲生石窗虛日弄紗姚合

心同

孤鶴靜節效古松貞沈佺期

名香泛窗戶遠岫對壺觴許渾

墨研清露月琴響碧天秋李商隱

地迴

雲偏白亭香草不凡高適

接垣分竹徑微路入花源儲光義

美花多映竹喬木自成林孟浩然

邱

擊趣如此變鶴心悠然李起

柳深陶令宅月靜庾公樓李甫

苔石隨人古山花拂面香張九齡

長

笑對高柳貞心比古松李願

願持山作壽常與鶴為羣武三思

荷鋤修藥圃煮茗就花欄王維

澗

松寒轉直碧海闊逾澄王績

誰知大隱者乃是不羈人王維

詩思竹間得道心塵外逢元稹

暗水

流花徑清風滿竹林崔峒

從來多古意可以賦新詩甫

徑隱千重石園開四季花周繇

隔沼連香

麥緣巖覆綠蘿。李德裕甫 琴將天籟合。幔卷浪花浮。趙冬曦甫 野翠生松竹。潭香聞芰荷。孟浩然亦 頗得

湖山趣。不知城市喧。劉長卿 短歌能駐日。閒坐但聞香。宋之問 高松來好月。野竹上青霄。杜甫 松

風清耳目。薰氣襲衣襟。孟郊 七言云。川原繞繞浮雲外。臺榭參差積翠間。薛逢 松間明月長如此。

身外浮雲何足論。宋之問 窗含遠樹通書幌。風颭殘花落硯池。李賀 四野綠雲籠稼穡。一庭紅葉

掩衡茅。杜甫 常愛此中多勝事。更於何處學忘機。劉長卿 松持節操溪澆性。山展屏風花夾籬。李

白。閒看秋水心無事。靜聽天和興自濃。皇甫冉 陽羨春茶瑤草碧。蘭陵美酒鬱金香。錢起

楹帖中亦有所謂臺閣體者。五言集句云。大賢秉高鑒。上德表鴻名。孟郊 天與三台坐。儒開百代宗。

張九齡 謀猷歸哲匠。詞賦引文雄。王維 羽儀呈鸞鷲。藻思煥瓊琚。劉禹錫 麟筆刪金篆。霓裳侍

玉除。盧綸 一經傳舊德。八座起文昌。張元宗 雲山起翰墨。星斗煥文章。王珣 三光懸聖藻。一氣轉

洪鈞。沈佺期 道爲詩書重心緣。啓沃留高適。七言云。功名待寄凌烟閣。霄漢常懸捧日心。杜牧 千

秋錄紀朱鸞誥。五色光生綵鳳毛。李義府 瑞氣迴浮青玉案。清名合在紫微天。白居易 仰賀斯文歸

朗鑒。惟將直道歷崇班。齊己 聖代科名酬志業。中朝品秩重文章。方干 勳業定應歸鼎鼐。文章誰得

到采恩。徐寅 三千士裏文章伯。十二樓前侍從臣。盧綸 彩筆祇宜天上用。五雲多繞日邊飛。貫休

瑞草惟承天上露。繡衣却照禁中花。王千 萬卷圖書天祿上。四時雲物月華中。李白 更傍紫微瞻北

斗還將綵服詠南陵。薛蓬花迎綵服離鶯谷。閣倚晴天見鳳巢。羅錫七德龍韜開玉帳。三千犀甲

擁朱輪。駱賓王身應山河分岳瀆。功銘鼎呂繪麒麟。封益紳

梁山舟學士。所書楹帖多係集句。有鈔輯成本者。今錄其佳者如左。四言云。斧藻其德。言竹柏之懷。水

注。五言云。名隨市人隱。心與古佛閒。蘇竹石得幽秉。壺觴多雅游。文同六言云。讀書不求甚解。陶

節鼓琴足以自娛。莊七言云。我書意造本無法。蘇此老胸中常有詩。陸眉宇之間見風雅。笑談與世

殊白科。山谷文章或論到闡奧。梅聖俞笑談與世殊白科。見萬卷藏書宜子弟。山谷三田聚寶真生涯。

蘇。官如草木吾如土。東坡舌有風雷筆有神。見胸中已無少年事。門外猶多長者車。山谷張顛草

聖雄千古。焦遂高談驚四筵。遺山名高北斗星辰上。王廷圭詩在千山烟雨中。張孝祥輕鷗白鷺定吾友。

山谷。綠竹高松無俗塵。劉公是纒成白雪三千丈。荆公淨掃清風五百間。蘇更築園林負城郭。荆公

先安筆研對溪山。放翁蹙踏鮑謝跨徐庾。蘇網羅秦漢近唐虞。傅蔡八言云。行道有福。能勤有繼。居

安思危。在約思純。左冰生於水而寒於水。荀雲出其山復雨其山。詩如此風神。惟須飲酒。北既佳光

景。當是劇棋。南小窗多明。使我久坐。入門有喜。與君笑言。易德有潤身。禮不愆器。顏延玉輶庭照。蘭

生室香。庾子平理若衡。照辭如鏡。動墨橫錦。搖筆散珠。文心山水有靈。亦驚知己。水經性情所得。未

能忘言。庾子閉戶自精。開卷有益。任彥昇垂露在手。清風入懷。柳子厚碧山人來。幽鳥相逐。金尊酒滿。奇

花初胎詩 脂粉簡編冠纓圖史李義山句 糠粃禮義錙銖功名王績 九言云如良金美玉無施不可張說

非精墨佳筆末嘗輒書裴行儉傳 十言云無江海而閒不導引而壽莊子 乃邦家之光非閭里之榮歐文

吳青士郡丞延榕自吳中錄寄集句八字聯皆古雅可愛今擇錄其尤佳者如左云赤野生姿青田矯翰

唐婁師德契必明碑白雲怡意清泉洗心李邕葉有道碑 蘊智成囊含明作鏡唐劉待價令狐仁政碑 憑春灑翰席月抽琴北魏高

如筠斯清比蕙又暢唐宋儕報友書 逢岑愛曲值石憐欲魏姜質亭山賦 器重南金才橫東箭高后碑 辨雕春困德瑩

秋天唐太宗訪 綴響蘭深緝言瓊祕謝莊武帝册 沈思泉湧華藻雲浮魏下闡贊述太子賦 鳥嘯歌來花濃雪聚庾

馬射賦雲隨竹動月共水流陳後主夜庭度雁賦 春水兩派晴山數曲大隱賦 朱輪十乘紫詣千篇幽居賦 薛引山茵

荷抽水蓋王勃東屋山池賦 琴號珠柱書名玉杯庾信小園賦 激揚傾學誘接後進南史張融傳 甄明政術曉達公方唐

宗訪才經緯區宇彌綸蔡憲雕龍文心 抑揚人傑雕繪士林契苾明碑 綴響蘭深緝言瓊祕謝莊武帝册 秉仁嶽峻

動智淵明崔敬龜碑 修風曉逸德星夕映謝莊武帝册 祥禽翬作瑞木朋生鮑照河清頌 澤雨無偏心田受潤簡文

去頌表謝莊武帝册 絃雲旣擁智海亦深簡文與智炎書 抗心希古任其所尚含毫命素動必依真隋姚察名畫記 溥露飛甘舒雲

結慶謝莊武帝册 貞筠抽箭潤壁懷山王融贈叔詩 壯思風逸情雲上謝朓七夕賦 朗姿玉暢惠風蘭披宋孫康團扇賦

謝默卿邑侯元淮自梁溪錄寄集句各聯皆工穩附錄於左云井竈有餘處林園無俗情揮茲一觴未

知明日事遠之八表正賴古人書以上集陶詩 精義測神奧清機發妙理遠想出宏域高步超常倫集文選句

謳吟垌野。金石雲陞。棟梁文囿。冠冕詞林。文心雕龍。庾開府集。芝洞秋房。檀林春乳。桂深冬燠。松踈夏寒。庾開府句。

舉頭望明月。盪胸生層雲。集李杜句。楓葉荻花秋瑟瑟。浴鳧飛鷺晚悠悠。集白杜句。家醞滿瓶書滿架。山花如

繡草如茵。集唐杜詩。集司空聖。蝶銜花蕊蜂銜粉。犀辟塵埃玉辟寒。集李義山句。碧苔芳暉如有佳語。綠杉野屋良殫美

襟。集司空聖。下同。隔溪漁舟。幽鳥相逐。亂山喬木。奇花初胎。妙機其微。是有真宰。遠引莫至。忽逢幽人。

娟娟羣松。上有飛瀑。蕭蕭落葉。人間清鐘。紅杏在林。幽鳥相逐。碧桃滿樹。清露未晞。蓄素守中。所

思不遠。返虛入渾。其聲愈希。神化攸同。控物自富。性情所至。著手成春。與古爲新。載瞻星氣。其曰可

讀。如寫陽春。

焦氏易林中。語多吉祥。有集句爲聯語云。砥德礪才。爲國藩輔。布政施惠。生我福人。含和履中。駕福乘

喜。年豐歲熟。政樂民仁。論仁議福。保我金玉。達性任情。樂其安閒。道德神仙。增榮益譽。福祿歡喜。長

樂永康。

余小霞有集句聯云。隨遇而安。因樹爲屋。會心不遠。開門見山。又云。天半朱霞。雲中白鶴。山間明月。江上

清風。子曾集蘇句爲聯贈之云。勸子勿爲官所腐。知君欲以詩相磨。又一聯云。筆老詩新疑有物。水清石

瘦亦能奇。

聞有集前人句題酒家樓者云。勸君更盡一杯酒。與爾同消萬古愁。可謂工絕。

黎澗溪河帥廳事有桂未谷覆分書集句一聯云。天根月窟閒來往。羅沙大石相磨治。余每進謁。屢目之。河帥曰。君賞其書乎。惜集句殊不倫不類也。余曰。桂作此時。初不爲公。自今觀之。則所集殊雅切。河帥詰其說。余曰。上語謂公治易。對語謂公治河耳。同僚尙未喻。余曰。上語謂作河上易注。對語謂辦碎石坦坡耳。衆始驟然。

吳信辰集司空曙李頎一聯云。翠竹黃花皆佛性。清池皓月照禪心。以題佛寺恰好。

李蘭卿守思恩時。於賓州建聽荷小閣。集句聯云。眼明小閣浮烟翠。身在荷香水影中。跋云。道光丁亥六月。按試賓州。以是月二十四日。作荷花生日。時阮春畚刺史。重葺是閣。方成。而中漁溪。陳紫瀾。劉夢庭。三明府。皆不期而會。一時之盛。衆賓俱驩。余題扁榜曰。荷花世界。並集東坡誠齋詩句。懸於閣柱。

達誠齋達三權稅粵關。喜談文字。頗通易學。有別業在署旁。名淨芳園。權使自爲集句一聯云。閒坐小窗讀周易。每依南斗望京華。

相傳徽州城中有戲臺初成。徽之巨商撰聯。得一句云。聲爲律呂身爲度。久不能對。曰。有能集成語對者。當厚酬之。時方朴山先生。命其子德往對。曰。雲想衣裳花想容。徽商酬以百金。先生笑曰。七字百金。李太白惠我無疆也。按對句勝於出句。出句呂字添出身爲度三字。亦無著。適成其爲徽商本領也。

近人有集句楹帖云。大兒孔文舉。小兒楊德祖。前身陶彭澤。後身韋蘇州。以東坡詩對禰衡傳。天然比偶。

惜無人能當此語耳。

石墨文字。以石鼓文爲最古。近有集爲篆聯者云。道藝工於寫華柳。秀靈時或載淵魚。不華不樸同所好。旣安旣甯樂。遇時。寧樸毋華。以康我道。旣安迺樂。共寫其天。道旨淵微。深於四子。詞華工秀。大如六朝。

桂林城中巖洞。以風洞山爲最。卽疊綵山也。山中座落。又以景風閣爲最。葉琴柯中丞紹楹集禊帖字爲聯云。林間虛室足觴詠。山外清流無古今。余亦擬集韓句一聯云。粉牆丹柱動光彩。高厓巨壁爭開張。

余編梓聯話將竣。適賀耦庚中丞郵信來。以集句兩聯索書。一七字云。行不得則反求諸己。躬自厚而薄責於人。又八字云。視履考祥。其旋元吉。清明在躬。氣志如神。因附識之。以下集字

西嶽華山碑。前明已燬。今海內只有三拓本。余所藏者華陰郭允伯舊物。曾歸朱笥河先生者也。碑爲蔡中郎所書。近人有集碑字爲楹帖者。如云。漢壁秦璆千歲品。光風嘉月四時春。和平峻望中書令。典則高文太史公。歲星仙氣原方朔。璧月新詞是義山。玉堂修史文皆典。香案承書望若仙。

陳曼生郡丞有集三公山碑字一聯云。老屋三間可蔽風雨。空山一士獨注離騷。

柳誠懸所書元祕塔銘。雄偉奇特。最宜於作楹聯。有集字成句者云。山靜日長仁者壽。荷香風善聖之清。窮經安有息肩日。學道方爲絕頂人。情詞超邁高常侍。書法清圓趙集賢。

敬客所書王居士塔銘。乃褚派也。近人喜學之。姿態橫生。惟以作大字。則規撫稍有不足。亦有集字爲楹帖者云。天然文吐春雲潤。悟後心如秋月超。明月超然懷遠鑒。緒風和處覺春生。書求往迹得其化。文有真宗鑒乃神。風節爲貞金樂石。心神如秋月春雲。

顏魯公爭坐位帖。字不及寸。而拓作大字。則有雄偉之觀。勝於臨摹他蹟。近有集帖字爲楹聯者。語亦岸異不羣。七言云。身向尺天崇位業。人從香海望才名。恬然清行同南部。積有文才是左思。一誠有定同。葵向百故皆恬若海容。校書長愛階前月。品畫微聞座右香。清時盛治人同仰。名世高文衆所師。

其書莫廢文明道。不爵而尊禮衛身。畏友恨難終日對。異書喜有故人藏。月寮烟閣標清興。文府書城縱古今。書到右軍難品次。文如開府得縱橫。滿室古香人有會。當階清蔭月初中。立志須如三古盛。爲書自起一家言。八言云。立功德言有三不朽。尙齒爵位無一非尊。功冠凌烟紀綱文武。才高畫日捐益古今。立德立功居之以敬。友直友諒尊其所聞。有集顏魯公多寶塔碑字爲楹帖者。近刻成板聯。墨搨亦頗可觀。句云。天然深秀檐前樹。自在流行檻外雲。脫俗書成一家法。寫生卷有四時春。顏魯公書東方朔像讚字。莊嚴合矩。在多寶塔之上。有集字成聯者云。德星人是東方朔。雄辨文如石曼卿。作者多大方家。數望之如神仙中人。清而不矯。心無滓。儉以爲節。家之肥。學以精神通廣大。從清儉足平安。

釋山碑原石已不可考。今所傳本乃五代鄭文寶重刻。而典型具在。殊可臨摹。近有集碑字爲聯云。追古思今。道在作者。登高望遠。時復樂之。爲樂及時。令德無極。去古不遠。直道在斯。日有所思。經史如詔。久於其道。金石爲開。山澤高下。理所著。金石刻作。臣能爲。

王右軍蘭亭。數字。執筆者無不奉爲矩型。近人有集字爲楹聯者。亦自巧思綺合。五言云。暢懷年大有。極日世同春。室有山林樂。人同天地春。惠日朗虛室。清風懷古人。風竹引天樂。林亭集古春。六言云。今趣豈異於古。天聽可期諸人。文情生若春水。絃詠寄之天風。七言云。有足春隨惠風至。無懷人合盛時生。游春人若在天坐。聽曲情隨流水生。文生於情有春氣。興之所至無古人。情文俯仰懷遷固。述作風流契老彭。流水永無風浪作。春情時以管絃和。絲竹放懷春未暮。清和爲氣日初長。寄興在山亭水曲。懷人於日暮春初。遇事虛懷觀一是。與人和氣察羣言。與絃作契風生竹。列坐爲情水抱山。觀水期於無盡地。生天當是有情人。隨羣流。觀極盛事。欣樂歲。述古初言。得趣在形骸以外。娛懷於天地之初。流水情文曲有致。至人懷抱和無同。極清閒地是蘭若。觀自在春於竹林。追隨永日情殊暢。坐領春風氣不羣。坐隨蘭若幽懷暢。游及竹林躁氣清。靜坐不虛蘭室趣。清游自帶竹林風。隨所遇時將靜悟。老於文者不陳言。得山水樂寄懷抱。於古今文觀異同。放水流長觀其曲。爲文氣盛集於虛。虛懷視水人咸悟。和氣爲春天與游。將合萬類爲一己。每以內觀當外游。

知足一生得自在。靜觀萬類無人爲。大文間世有述作。至樂在人無古今。山水之間有清契。林亭以外無世情。虛竹幽蘭生靜氣。和風朗月喻天懷。羣然和者幽蘭曲。快哉當之修竹風。古與爲懷稽作者。興隨所引契天然。風人所詠託於古。靜者之懷和若春。清風有信隨蘭得。激水爲湍抱竹流。室因抱水隨其曲。竹爲觀山不放長。亭間流水自今古。竹外春山時有無。山有此生未能至。竹爲一日不可無。八言云。畢生所長。豈在集古。閒情自託。亦不猶人。不次之遷。人同品峻。及時爲惠。情與春長。今古畢陳。趣生一室。人天輿感。文可萬言。誕妄不生。虛無視事。幽閒自得。清靜爲修。林氣映天。竹陰在地。日長似歲。水靜於人。小有清閒。抱絃懷古。隨其時地。修己觀人。清氣若蘭。虛懷當竹。樂情在水。靜氣同山。春水初生。係懷左右。清風惠及。盛領情文。九言云。今文與古文。期其一。是無極爲太極。化可萬殊。

近吾鄉鄭雲麓觀察開禧。有知足齋集禊序楹帖一帙。刻於粵東。董琴南爲之序。亦集帖中字。所稱既極自然。又有生趣者。信不虛也。茲擇其尤佳者錄之云。生當稽古右文日。老作觀山樂水人。人品清於在山水。天懷暢若當風蘭。世間清品至蘭極。賢者虛懷與竹同。時契幽懷同靜氣。因觀流水悟文情。有時自向竹間坐。無事一至蘭若游。爲人不外修齊事。所樂自在山水間。隨時靜錄古今事。盡日放懷天地間。修己可知有樂地。作文自合舍陳言。作文每期於古合。寄懷時或與天遊。萬類靜觀咸

自得。一春幽興。少人知。世情豈盡能相合。賢者所爲固自殊。人品若山極崇峻。情懷與水同清幽。大賢自合爲九列。清風可以流萬年。信之爲言有諸己。文亦不外生於情。盡日山游得風趣。一生浪迹契天隨。老可情懷常作竹。少文樂事在游山。述古期同彭不作。臨風若遇惠之和。昔時嘗品惠山水。異日期爲少室游。自古在昔有述作。當今之世咸清賢。

懷仁聖教序本集。右軍遺字而成。近復有集序中字作楹帖者。古雅可喜。五言云。鹿門多大隱。花洞有長春。雲霞生異彩。山水有清音。波綠生春早。雲歸注雨遲。有雨雲生石。無風葉滿山。七言云。黃昏花影二分月。細雨春林一半煙。明月不離光宅寺。清風常渡出山鐘。清華詞作雲霞彩。典重文成金石聲。勝地花開香雪海。妙林經說大羅天。一藏梵聲濤在口。滿林花影月苞山。九萬里風斯在下。八千年木自爲春。天機清曠長生海。心地光明不夜燈。承恩淇露三春重。被體香羅九夏輕。機雲才學有天趣。王謝風流本性成。法雨慈雲覩色相。清池明月露禪心。萬里波濤歸海國。一山花木作香城。座攬清輝萬川月。胸涵和氣四時春。八體六書生奧妙。五山十水見精神。松濤在耳聲彌靜。山月照人清不寒。紫薇華省承綸誥。金粟香風舞綵衣。書成花露朝分潔。悟對松風夜共幽。珠林墨妙三唐字。金匱文高二漢風。謝傅心情託山水。子瞻風骨是神仙。燈火夜深書有味。墨花晨滿字生光。

歐陽率更書醴泉銘。字最方整。臨作楹帖尤宜。有集字成聯者。七言云。月沼觀心清。若鏡雲房養氣潤。於珠。德取延和謙則吉。功資養性壽而安。西清恩挹三霄露。東觀文成五色雲。一室圖書自清潔。百家文史足風流。巖前鍊石雲爲質。檻外流泉月有聲。爲學深知書有味。觀心澄覺寶生光。功深書味常流露。學盛謙光更吉祥。八言云。氣淑年和。羣生成遂。冰凝鏡澈。百姓爲心。良玉潤珠。精神流照。吉金樂石。左右交輝。甘露卿雲。於斯爲瑞。珠輝玉照。蓋代之華。瓊質金相。當時之寶。頌經風緯。冠世而華。近張澥山方伯岳崧。集字書聯見贈云。鳳質龍文。光華相映。景風淑氣。仁壽同登。室臨春水。幽懷朗坐。對賢人。躁氣無。此姚姬傳先生薰。集禊帖字聯。以贈羅子信太史者。

楹聯叢話

卷十二

雜綴諧語附

朱竹垞先生在京師除夕。署門聯云。且將酩酊酬佳節。未有涓埃答聖朝。脫盡名士習氣。而未嘗不傳誦於時。所謂言以人重也。又罷官後。集句爲門聯云。聖朝無棄物。餘事作詩人。其實詩人二字。尙不足以盡先生耳。

彭文勤公自書京邸春聯云。門心皆水。物我同春。日下士大夫。頗以出語爲話柄。不過以門心二字強捏耳。然古人此等句法甚多。唐賈島題長江廳詩。有言心俱好靜之句。意境正與相似。則用之楹帖。有何不可。况對句甚渾成乎。後汪銳齋儀曹德鏞仿其意云。臣心如水。王道猶龍。則青出於藍。而不能青於藍矣。京師宦宅。所製春聯。每喜以本歲干支分冠於首。如乙未云。乙近杏花袍曳紫。未勻柳色綬拖黃。丁酉云。丁歲觀光慙國士。西山探祕識奇書。皆有淩泊痕迹。莫如戊寅歲一聯云。吉日維戊。太歲在寅。爲自然也。畫舫錄云。岳大將軍鍾琪。以名將兼通文墨。嘗訪舊好蜀僧大岳於揚州樂善庵。卽席贈以聯句云。有月

卽登臺。無論春夏秋冬夏。是風皆入座。不分南北東西。庵卽譯經臺舊址也。或以此聯爲李笠翁所撰。英煦齋師曰。余未諳習內典。臨摹古人所寫佛經。偶有會心。如比邱尼。豈非尊我孔子乎。居馬蘭峪工次。時工人於舊寺中添建三教聖人殿。求作聯語。遂書與之云。西域談經。心仰尼山思竊比。東周問禮。語傳柱史戒深藏。

吾鄉林樾亭先生喬蔭。淇深經史之學。復工駢儷之文。有壽其姊夫李志漢封翁一聯云。寶樹蔚彤雲。知諸出有陽元。望他日成吾宅相。華堂盈紫氣。游厥初於聃耳。喜長生本自家傳。封翁爲李研雲鴻瑞之父。蘭卿都轉之祖。宅相信不虛矣。

王夢樓先生贈蔣心餘聯云。前輩典型。秀才風味。華嵩品格。河海文章。汪劍潭端光亦有贈聯云。沾酒近交鄉父老。解衣平揖漢公卿。

阮梅叔亨。爲芸臺先生介弟。文采風流。不愧難弟之目。曾撰瀛舟筆談十二卷。皆雜紀先生撫浙時事也。洪稚存先生夷吉。於嘉慶戊辰八月十三日游曲江亭。始與定交。用篆書楹帖贈之云。第五之名齊票騎。十三此夜訂心交。梅叔甚喜。卽附記於瀛舟筆談中。

張南山松軒隨筆云。高要莫善齋廣文元伯。以學行聞於時。馮魚山先生敏昌。贈以楹帖云。奉母孝經看。在手。教兒文選讀從頭。

吳興包果峰敬堂。有著作才。阮芸臺先生最賞異之。嘗贈聯云。吳興山水。古來清遠。包咸論語。今尙流傳。李松雲先生。少年科第。後頗偃蹇。年六十時。猶官成都知府。自壽聯云。三館六曹。十七科。競稱前輩。一官萬里。二千石。遂老斯人。

秋雨菴隨筆云。子建之才八斗。我得一斗。天下共分一斗。以斗論才。奇矣。有曹姓人爲彭澤令。其友人贈一聯云。二分山色三分水。五斗功名八斗才。運典恰切。

蘭州府城西火祖廟。元宵燈火最盛。余曾於公餘往觀。記得吳信辰一聯云。鑽燧木先春。食德飲和。且自披星朝赤帝。觀燈天不夜。衢歌巷舞。何妨捧日待黃人。

王孚遠方伯述。爲滇臬時。每赴城外監視行刑。必就其地關廟行香。此廟僻在郊坰。且非有行刑事。直爲人跡所不到。寺僧乞製廟聯。因以意撰句云。度一切衆生於夢幻後。存千秋大義在天壤間。可謂不卽不離。又言浙江桃花嶺有關廟。縉雲程教諭文溢撰聯云。當時諸葛大名。荒祠古柏。嗟回首萬牛。何如漢壽亭垂徧開蘭若。此地洞天小有。絕壁修篁。肅臨風千繭。休比武陵源貌。空說桃花。據云。此聯在浙東。頗膾炙於人口。然上聯無端壓倒諸葛公。已屬無謂。下聯祇敷衍得桃花二字。實非佳構也。

西湖詩僧小顛。有萬峰山房稿。預爲涅槃塔院。嘗於所居榜一聯云。老屋將傾。只管淹留何日去。新居未卜。不妨小住幾時來。

張南山爲余述武后廟聯云。六宮粉黛無顏色。萬國衣冠拜冕旒。武后何以有廟。廟亦不知在何地。而聯語則亦莊亦諧。精切不易矣。

李笠翁云。李申玉廣文家有聲樂。余贈之聯云。門多桃李。案少簿書。別宦恐無此樂。前列生徒。後盈絲竹。今時復有其人。又申玉之內子。生於元旦。是日稱觴。卽合家姬試演新劇。余亦有聯云。元旦卽稱觴。鶴算龜齡齊讓早。歲朝先試樂。鶯歌燕語盡翻新。

笠翁芥子園門前二柳。門內二桃。桃熟時。人多竊取。因戲書一聯於戶云。二柳當門。家計遜陶潛之半。雙桃踰戶。人謀慮方朔之三。人以爲謔而不虐。又題歌臺云。休縈俗事催霜鬢。且製新歌付雪兒。又題大門云。孫楚樓邊觴月地。孝侯臺畔讀書人。孫楚酒樓。爲白門古蹟。太白觴月於此。周處讀書臺。則與芥子園適相鄰也。

賈膠侯中丞。有大園亭。棄而不居。改爲鄉館。凡山右名賢之客都門者。皆得寓焉。李笠翁贈之聯云。未聞安石乘東山。公能不有斯園。賢於古人遠矣。漫說少陵開廣廈。彼僅空懷此願。較之今日何如。

柯岸初居臺諫幾二十年。李笠翁贈聯云。諫垣彌久望彌尊。看此際三公。都是當年等輩。封事愈多功愈懋。卜將來一擢。盡補往日淹留。

笠翁有除夕贈程蕉鹿文宗一聯云。世間桃李。盡出公門。何須臘盡始芳菲。滿眼無非春色。天下魚龍。都

歸學海。不待時來方變化。啓口卽是雷聲。

嘗見劉文清公書楹帖云。鏡裏有梅新晉馬。釜中無藥舊唐雞。不知所謂。或云是錢東澗句。隨園詩話補遺云。對聯之佳者。或題禪堂云。無法向人說。將心替汝安。佛座云。大護法。不見僧過。善知識。能調物情。題虎邱畫春册店門云。一陰一陽之謂道。此時此際難爲情。題戲臺後云。做戲何如看戲樂。下場更比上場難。或見贈云。天上何曾有山水。人間樂得做神仙。

秦澗泉學士請假南歸。卜居於武定橋畔。相傳爲前明何尙書汝寵故宅。取東坡瞻望玉堂如在天上之意。名其園曰瞻園。園中有東山樓。自爲聯云。辛勤有此廬。抽身歸矣。喜鳥啼花笑。三徑常開。好領取竹簾清風。茆檐暖日。蕭閒無箇事。閉戶恬然。對茶熟香溫。一編獨抱。最難忘別來舊雨。經過名山。

江寧董觀橋制府教壇。督園浙時。愛西湖山水之勝。買宅於杭城之三撥營。擬解組後。作平泉之墅。榜其門云。聖代卽今多雨露。故鄉無此好湖山。妙偶天然。人多誦之。後制府未及予告。而已歸道山矣。

京中宣武門外之方壺齋。本戲園。今改爲官宅。余叔父太常公。首賃居之。公出視學廣西。余妹壻龔小峰。雙穀居之。獻歲自題門聯云。家傳渤海箕裘遠。春到方壺雨露新。一切姓。一切地。李芝齡宗叻亟稱之。費西塘京兆錫章。以召試舉人。歷登清要。中年興高采烈。晚乃漸識夷塗。嘗於書室中自撰一聯云。酒闌興倦。事往情遷。祇不忘遊過名山。別來舊雨。此與秦澗泉學士語相同。近吳山尊自撰聯句亦用之。或者襲學士語耳。春去仍歸。人老難復。更

休詫殿前起草。海外題詩。蓋京兆久爲軍機章京。以才望著名。及居諫垣。又曾奉命充冊封琉球使者也。秋雨菴隨筆云。葛秋生慶曾齋中懸一聯云。書似青山常亂疊。燈如紅豆最相思。語極清新。青山句。秋生自擬紅豆句。則許溟生太史乃普所對也。

宣武門外上斜街。趙象菴舍人家。菊花最盛。自號菊隱。花時過客如織。聞其初未著名時。來觀者率不通。謁亦不問主人爲誰。一日劉金門先生同京朝官。借其園亭賞菊。酒闌。主人出素紙求先生楹帖。且乞新製。問主人有何好。答云。無他好。惟愛菊如性命耳。先生信手書云。祇以菊花爲性命。而未有對語。復問主人何姓。答云。姓趙。乃一揮而就云。本來松雪是神仙。一座歎其工敏。

秋雨菴隨筆云。伊犁有過復亭。蓋爲謫官而設。劉金門宮保過之。題一聯云。過也如日月之食焉。復其見天地之心乎。運用成語。天造地設。

有以義園求劉金門先生撰聯者。先生集四書云。逝者如斯夫。掩之誠是也。確切不移。吾鄉福州會館屋後有野地一區。自前明卽立義園。每春秋兩祭。同鄉之在京師者咸集。聞鄉老言。舊有小亭。前明葉文忠公有聯云。滿眼蓬蒿游子淚。一盂麥飯故鄉情。悽婉動人。自余入京師。則亭久圯。聯亦不存矣。

余偶見一薙髮店中。懸整容堂扁。旁有聯云。雖然毫末技藝。却是頂上工夫。雖巧而不傷纖。又桃符綴語中載一聯云。不教白髮催人老。更喜春風滿面生。又秋雨菴隨筆中載一聯云。到來盡是彈冠客。此去應

無搔首人。皆頗自然。又牙行市肆通用聯云。其交以道。其接以禮。同聲相應。同氣相求。亦頗撲不破語也。大路邊茶亭。或題一聯於柱云。四大皆空。坐片刻。無分爾我。兩頭是路。喫一盞。各自東西。淺語頗有禪理。又杭州湧金門外藕香居茶室聯云。欲把西湖比西子。從來佳茗似佳人。集蘇句恰切。可入西湖志餘。鄭板橋六十自壽聯句云。常如作客。何問康寧。但使囊有餘錢。甕有餘釀。釜有餘糧。取數葉賞心。舊紙放浪吟哦。與耍闊。皮要頑。五官靈動勝千官。過到六旬猶少。定欲成仙。空生煩惱。祇令耳無俗聲。眼無俗物。胸無俗事。將幾枝隨意新花。縱橫穿插。睡得遲。起得早。一日清閒似兩日。算來百歲已多。板橋解組歸田日。有李嘯村者。贈之以聯。板橋方宴客。曰嘯村韻士。必有佳語。先觀其出聯云。三絕詩書畫。板橋曰。此難對。昔契丹使者。以三才天地人屬語。東坡對以四詩風雅頌。稱爲絕對。吾輩且共思之。限對就而後食。久之不屬。啓視之。則一官歸去來也。咸歎其工妙。厲樊榭先生。葬於杭州西溪王家塢。不久。遂爲榛莽。後四十餘年。何春渚琪游西溪。見草堆中有樊榭及姬人月上栗主在焉。因取歸。偕同人送至武林門外牙灣黃山谷祠中。掃灑一室以供之。按月上姓朱氏。烏程人。王蘭泉先生題其楹云。丈室花同天女散。摩圍詩共老人參。見蒲謁山房詩話。有集四書語爲典肆聯云。以其所有。易其所無。四境之內。萬物皆備於我。或曰取之。或曰無取。三年無改。一介不以與人。亦自穩切。

吳山尊有題友人某別業云。淥水漾丁簾。增我輩閒中風致。名園依丙舍。祝君家看到雲仍。雖無深意。而情文斐亘。自足動人。

聞吳山尊嘗於歲暮向孫淵如先生貸金。先生方自製室內桃符。謂山尊曰。君能代我成一佳聯。便當如所請。山尊應聲曰。上相教除名士氣。至尊親許讀書人。蓋上句乃董文恭公勗淵如之言。對句乃先生出試差復命時所親承天語也。先生喜其雅切。卽如所請。金數與之。山尊之善於譽人。皆此類也。

趙雨樓光祿與余同直樞地。同膺察典。而後余八年始出守鎮江。謁余於吳門。索書楹帖。余戲拈宋人句贈之云。醉中擲筆金鑾殿。睡起鳴笳鐵甕城。雨樓甚壯其語。然出句有倨侮之嫌。雖成語亦不敢落筆也。程春海侍郎最工作聯語。余守荊州之明年。卽擢淮海監司。適侍郎奉使督學黔中。過荊時。手揮一聯見贈云。南中喜得秦淮海。天下願識韓荊州。人皆服其工敏。後余擢藩吳門。侍郎主白下講席。贈聯云。名輩出樞垣。本杜斷房謀。陶甄南國。鴻才領詞坵。有歐書韓句。濡染東吳。乙未之秋。余奉召。復出授甘藩。瀕行。侍郎贈聯云。霖雨東興。樞密上才開遠略。好風西笑。湖山秀句帶邊聲。次年。余擢撫桂林。入覲時。侍郎復贈聯云。洪容齋隨筆成書。實著作之淵海。范致能驂鸞有錄。比宦游於神仙。適余方以退菴隨筆呈正。故出聯云爾。時同覲入京者。有賀耦庚中丞。侍郎亦贈聯云。以孝去。以忠來。到處蒼生望霖雨。是賢臣。是學者。一編經世出名山。蓋耦庚由江藩告養回籍。此次亦奉召復出。次聯謂所撰皇朝經世文鈔也。

春海贈林少穆督部聯云。理事若作眞書。緜密無間。愛民如保赤子。體會入微。少穆最工作小楷。故出聯自然。關合。次聯亦能酷肖其生平。

龔開齋觀察麗正。七十生辰。其子定菴儀部。求壽聯於春海。春海信筆書與之云。使君政比龔渤海。有子才如班孟堅。余亦寄一聯云。余世紀羣交。憶蘭省樞垣。齊向後塵趨軌範。傳家召杜譜。喜皖峰滬瀆。共聽兩地頌臺萊。蓋觀察初由禮部入軍機。於余皆爲前輩。而余宦江南。又適值觀察由安慶守擢蘇松監司也。

余福州老屋在黃巷。唐校書郎黃德溫先生璞故里。黃巢所稱儒者之宅。相戒勿犯者也。屋之對門爲酒壚。憶初入宅時。先叔父九山公。手書杜句作門聯云。座對賢人酒。門聽長者車。後酒家酒漸不售。遂歸咎此聯。以爲賢人語含譏諷。公因復集杜句改署於門曰。宅入先賢傳。門聽長者車。乃不踰年而酒家歇業。有一僮父奄有其地。改換門庭。後四十年。余由蘇藩假歸。遂卜居焉。

黃巷新宅之西。有小樓。余始葺而新之。黃巷中以此樓爲最古。因卽榜爲黃樓。集同人作詩張之。近以詩稿示余小霞。爲寄題一聯云。白傅早歸。一代福人居福地。蘇公再見。千秋黃巷重黃樓。

余於五十八歲。引疾歸里。有口號云。擇里仍居黃巷宅。辭官恰及白公年。李蘭卿以此十四字。作分書楹聯相贈。時方得文衡山芝南山閣畫卷。余自書芝南山館。扁於廳事。蓋寓知難而退之意。並自製一聯云。

歷中外廿年身。宦海扁舟。萬頃驚濤神尚悚。就高低數弓地。儒宮環塔。三竿曉日夢初醒。嗣於東園中葺藤花吟館。又製一聯云。有客醉無客睡。福簡簡吁可愧。長歌粗短歌疎。詩平平聊自娛。此二聯頗聞於時。江南僚友。有以爲妒者。又有百一峰閣。爲園中最高處。余所手建。並題聯云。平地起樓臺。恰雙塔雄標。三山秀拱。披襟坐霄漢。看中天霞起。大海瀾回。客有誦此聯。決余必當復出者。

百一峰閣之左。有樓三楹。余輯全園詩鈔於此。因以爲樓額。其聯則集前人句云。藏名詩酒間。竹屋紙窗清不俗。養拙江湖外。風臺月榭悄無言。樓之下爲寶蘭堂。因皮褚蘭亭石刻於此。卽集蘭亭字云。隨遇自生欣。暖日和風入懷抱。靜觀可娛老。崇蘭幽竹有情文。

桂林太守興靜山。以四月四日。周甲初度。余以聯壽之云。宜民頌起延年後。壽世筵開浴佛先。一切其官。一切其時。同人咸以爲工巧。蓋顏延年曾居此官。聊借用二字以寓壽意。尙不覺喫力也。

廣西節署之東南隅。有銅鼓亭。皮大銅鼓一。壁上嵌謝蘊山錢裴山二先生銅鼓詩石刻。其上有樓。因呼爲銅鼓樓。地勢最高。宜於登眺。桂林千峰百嶂。盡在眼中。迄今七十餘年。樓漸剝落。樓下榛莽塞徑。無過問者。余莅任之明年。始捐俸重修。並拂拭銅鼓。時幕府諸君皆能詩。因共和謝錢韻張其事。僚案亦以次繼聲。遂有銅鼓聯吟集之刻。樓旣新。僉謂宜有聯。因憶前人有集山谷東坡句云。全以山川爲眼界。故應賓主盡詩人。若移作此中聯語。情景俱合矣。因書而懸之樓楹云。

桂林棲霞山中有寺。由寺後穿山腹。可達七星巖。上有碧虛亭。爲范石湖舊蹟。亭前兩石柱刻聯云。先文穆風流宛在家。學士邱壑偶然。款署范時崇。蓋康熙中。曾爲粵西藩伯者。先文穆是石湖家學士。則不知所指。徧詢之都人士。並檢志乘中。皆不得其人。存以俟考。

堅瓠集云。泉州府學某教授。南海人。頗立崖岸。一日設宴於明倫堂。演西廂雜劇。有無名子書一聯於學門云。斯文不幸明倫堂上。除來南海先生。學校無光。教授館中。搬出西廂雜劇。某出見之。赧然自愧。故態頓除。以下諧語。

堅瓠集又云。常熟桑民悅。擢以才自負。居成均時。爲邱仲深所黜。後就教職。書對於明倫堂云。文章高似翰林院。法度嚴於按察司。

又云。天啓中一巡按。爲逆璫造生祠。題楹柱云。至聖至神。中乾坤而立極。允文允武。並日月以常新。有錄其詞以獻魏忠賢者。忠賢讀之不解。問左右何事。說到黃閣老。蓋黃立極者。同時宰相之名也。左右曰。某御史與爺作對耳。忠賢輒然變色。曰。多大御史。敢與我作對。趣召緹帥拘之。左右爲之再三解晰。始喜。又云。吳郡吳文之初名濟。方九歲。卽工屬文。嘗自書對聯云。移門欲就山當榻。補屋常愁雨溼書。與同里張濟同塾讀書。客聞其才。出對云。張吳二濟聯床讀。文之應云。嚴霍同光問世生。客善繪事。自撰句云。畫草發生。頃刻工夫非爲雨。文之應云。筆花燦爛。須臾造化不關春。客喜。卽以爲畫室楹聯云。

又云。吳門有富翁鄉居者。求楊南峰書門對。此翁之祖。曾爲人僕。南峰題云。家居綠水青山畔。人在春風和氣中。上列家人二字也。見者無不匿笑。

董文恭公有族人某居京師者。廳事懸一舊人所書聯云。賢者亦樂此。卓爾末由從。其字甚雄偉。寶之二十餘年矣。一日紀文達師偶過之。詫曰。此聯殆不可挂也。某詰其故。師曰。上聯首著賢字。下聯首著卓字。非君家遙遙兩華胄耶。某始爽然撤去。

京師戲園每演一劇。必分開數日。始了其緒。蓋勾留觀者。使不能中途而輟也。有集聯云。把往事。今朝重提起。破工夫。明日早些來。可稱工切。又鄉村戲臺聯云。父老閒來消白晝。兒童歸去話黃昏。又有集四書句云。聞絃歌之聲。賢者亦樂此。見羽毛之美。鄉人皆好之。上聯謂崑腔。下聯則亂彈武戲也。又一聯云。或爲君子小人。或爲才子佳人。登場便見。有時歡天喜地。有時驚天動地。轉眼皆空。語雖質俚。亦自隱括。近有集禊帖字云。稽古昔。畢類其人。賢以生爲趣。由丑作託。清閒咸臨此地。情隨事感。曲有文聽。又吳立甫拔貢大本。醉後爲人促作戲臺聯。因集句付之云。古今人何遽不相及。天下事當作如是觀。又有作戲臺後一聯云。凡事莫當前。看戲何如聽戲好。爲人須顧後。上臺終有下臺時。則幾於格言矣。

京師慶寧園戲臺聯云。大千春色在眉頭。記當年翠暖珠香。曾游膽部。五萬鶯花如夢裏。念此日丁歌甲舞。重睡崑崙。詞意在可解不可解間。或云是戔筆。大抵戲臺聯。莊諧並宜。但忌俗耳。或集經語云。治世之

香安以樂。君子有酒旨且多。則莊重不佻。用於官廨尤宜也。

余紫松提戎步雲曰。記得圓明園有一戲臺聯云。堯舜生湯武淨。五霸七雄丑未耳。伊尹太公便算一隻。耍手其餘拜將封侯。不過搖旗呐喊稱奴婢。四書白六經引諸子百家雜說也。杜甫李白會唱幾句亂談。此外咬文嚼字。大都緣街乞食鬧蓮花。似此大識力大議論。斷非凡手所能爲。或以爲自大內傳出者近之。

對聯有可解頤者。康熙時廣東詩僧住海珠寺。交通公卿。寺塑金剛與彌勒環坐。對聯云。莫怪和尚們這般大樣。請看護法者豈是小人。又楊蘭坡題倒坐觀音像云。問大士緣何倒坐。恨凡夫不肯回頭。又江西某君題養濟院云。看諸君腦滿腸肥。此日共餐常住飯。想一樣鐘鳴鼎食。前身都是宰官身。

乾隆庚子歲。二藏活佛來朝。供帳極盛。住雍和宮。遠近僧徒叅謁者。日以千計。活佛高坐趺。無少動也。未幾以出痘死。有好事者。送一輓聯云。渺渺三魂活佛竟成死鬼。迢迢萬里東來不見西歸。時傳爲笑柄。魏善伯徵士題范觀公中丞廁聯云。成文自古稱三上。作賦於今過十年。廁不必聯。然如此雅切大方。亦可喜。若一夕話所載。莫道輪回輸五穀。可儲筆札賦三都。又但願生民無殿屎。不慙宰相受堂餐。又官司不令多中飽。燕飲應知無後艱。則又遜前語矣。

繆蓮仙塗說云。安徽無爲州老諸生。得欽賜舉人。自作一堂聯云。並未出房。虧得白頭髮秀士。何嘗中式。

倒做了黑耳朵舉人。蓋俗以衙門中未上名而幫差者爲黑耳朵。故戲用之。又有一廩膳生得欽賜副榜者。亦自書一堂聯云。說甚功名。只免得三年一考。有何體面。倒少了四兩八錢。末句蓋言慶祿也。

袁簡齋先生云。或傳程魚門編修督芳。京中移居詩云。勢家歇馬評珍玩。冷客攤錢問故書。予笑曰。此必琉璃廠也。詢之果然。因記商寶意移居。周蘭坡與萬晴初訪之。見門對云。豈有文章驚海內。從無書札到公卿。萬曰。此必商君宅矣。詢之亦果然。

續消夏錄云。張明經晴嵐。除夕前自題門聯云。三間東倒西歪屋。一個千鎚百鍊人。適有鍛鐵者。求彭信甫書門聯。信甫戲書此二句與之。兩家望衡對宇。見者無不失笑。二人本辛酉拔貢同年。頗契厚。坐此竟成嫌隙。所謂凡戲無益。此亦一端也。

魯亮儕觀察。性粗豪。而所居屋狹。自署其門聯云。兩間東倒西歪屋。一個南腔北調人。見茶餘客話。擊瓠集載漳浦趙從誼。知獨山州。州城極荒涼。衙署尤陋。趙自題楹柱一聯云。茅屋三間。坐由我。臥由我。里長一個。左是他。右是他。

柳南隨筆云。崑山歸元恭先生。狂士也。家貧甚。扉破至不可闔。椅敗至不可移。則俱以緯蕭縛之。遂書一扁曰。結繩而治。又除夕署其門楹云。一鎗戳出窮鬼去。雙鈎搭進富神來。其不經多此類。時人呼之爲歸癡云。

陳文恭續訓俗遺規內載一事云。常州一老布衣。平時好狡。自號清客。書門對曰。心中無半點事。眼前有十二孫。有人續寫其下云。心中無半點事。半生不曾完糧。眼前有十二孫。十個未經出痘。見者絕倒。有一縣令自題其署外大門云。愛民若子。執法如山。實非良吏也。他日有無名子續寫其後。成一長聯云。愛民若子。牛羊父母。倉廩父母。供爲子職而已矣。執法如山。寶藏與焉。貨財殖焉。是豈山之性也哉。記得宋漫堂筠廊偶筆中載一年老令君。大書縣治之前曰。三不要。下注一不要錢。二不要官。三不要命。次日視之。則每行下各添二字。不要錢下曰嫌少。不要官下曰嫌小。不要命下曰嫌老。蓋與此同一惡諷也。有某太守。清苑人。曾令涇縣。以貪酷聞。一日晨起。見廳事貼一四書集句聯云。彼哉彼哉。北方之學者。何足算也。戒之戒之。南人有言曰。其無後乎。

前明袁捧菴于令。以荊州守罷歸。流寓金陵。落魄不得意。大書門聯云。佛言不可說。不可說。子曰如之何。如之何。亦自謂以經對經也。

明末有海中渠魁。至普陀山設齋一月。手題楹柱云。自在自觀觀自在。如來如見見如來。其字至今猶存。公牘中字義。多不可解。嘉應湯滋圃游幕南陽時。戲作聯云。勞形於詳驗。關咨移檄牒。寓目在欽蒙。奉准據爲承。亦所謂以不解解之也。

嘉慶間。粵洋有巨盜郭學顯者。乳名郭婆帶。雖剽掠爲生。而性頗好學。舟中書籍鱗次。無一不備。船頭一

聯云道不行。乘桴浮於海。人之患。束帶立於朝。在洋驛騷多年。官兵莫敢捕治。後爲百菊溪制軍招降。予以官。辭不受。於羊城買屋課子。以布衣終。

嘉慶間。周蓮塘。大宗伯兆基。薨。德州盧南石師代之。時費西壩爲京兆尹。與周至好。往弔。日一哭而殂。京師戲爲周作輓聯云。一品頭銜讓南石。三聲腸斷失西壩。

李艾塘云。揚州虹橋東岸。有靈土地廟。其前爲過街亭。凡喪殯出城。廟僧輒有路祭。禮拜誠敬之意。如所親暱。以此爲終歲孟飯計。惟風雪苦寒。不能出戶時。但於枕上聞千百人履聲及笑語歌嘯。不絕於耳。每生寶山空回之感。廟中有集聯云。到處雲山到處佛。當坊土地當坊靈。上語爲金冬心農登嵩雜述詩句。對語爲鄭板橋題如皋土地廟聯句云。鄉里鼓兒鄉里打。當坊土地當坊靈。

青春鸚鵡。楊柳樓臺。司空表聖詩品句也。陳曼生郡丞集二句爲對云。綠綺鳳凰。梧桐庭院。注云。張子野詞。請梁山舟學士爲書楹帖。學士愛其工麗。欣然書之。後徧考子野詞。並無此二句。蓋竟屬郡丞杜撰也。嘉靖末。宜興大疫。有二青衿俱死。同上閻王殿。一從東廊。一從西廊。各相眇以目。王察其籍。皆以無罪放回。從東者述所見柱上聯語。爲天道地道人道鬼道。道道無窮。恨不見西柱對。從西者述所見云。胎生卵生。溼生化生。生生不已。其餘所見皆同。

福州鄉俗。每逢端午節。旣於朔日懸蒲插艾於門庭。而五日午時。又必用紅箋書對句。貼於楹柱。謂之午

曹石倉先生。以此賞異之。近日通行之語。如海國中天節。江城五月春。及保艾思君子。依蒲祝聖人。語尙近雅。時人又有自出新製者。未免纖佻。其用艾旗招百福。蒲劍斬千邪。及蒲帶榮封一品。艾旗捷報三元。舊語者。蓋十家而九。則墮入惡道矣。

程春海侍郎。在京邸續娶。黃左田先生贈聯云。調羹定識威姑性。灑翰應增呂子書。陳石士前輩用光亦贈聯云。博議書成臨月按。合歡酒熟對花斟。皆自謂雅切。續娶時亦頗傳誦之。按此沿用俗傳東萊博議成於新娶一月。事實未考也。本書自序。謂屏處東陽之武川里。有從游者。談餘語隙。波及課試之文。乃取左氏書理亂得失之迹。疏其說於下。旬儲月積。浸就篇帙云云。無一語涉及新娶者。又考呂公年譜。初娶韓元吉女。在紹興二十七年。時居信州。不居東陽。後乾道三年。持母喪。居明招山。學子有來講習者。四年已成博議。五年二月除服。乃繼娶韓氏女弟。則是書實成於喪制中。流俗所傳。不足辨矣。

楹聯續話

卷一

故事

余輯楹聯叢話前編應制門。所錄野獲編中袁文榮撰嘉靖齋醮對聯。洛水元龜云云。實當改入故事門。今考鈕玉樵琇觚臚亦載此事云。崑崙山人初入都。客淮南李公春芳所時。世宗齋居西宮。建設醮壇。敕大臣製青詞一聯。懸於壇門。春芳使山人爲之。山人走筆題曰。洛水靈龜初獻瑞。陽數九。陰數九。九九八十一數。數通乎道。道合元始天尊。一誠有感。岐山威鳳兩呈祥。雄聲六。雌聲六。六六三十六聲。聲聞於天。天生嘉靖皇帝。萬壽無疆。李以進呈。深加獎賞。由是公卿互相延譽。其本傳謂大臣應制青詞。多假手山人者。以此乃他人移之別氏。則以雕蟲爲山人諱也。按此與野獲編所載互異。前編所錄元龜丹鳳。此作靈龜威鳳。尙可兩存。而前編作雄鳴雌鳴。則係傳寫之誤。自應從此作雄聲雌聲。以與三十六聲相應也。周櫟園書影云。坡公嘗言奉使西邸時。見書此數句。愛而錄之云。人間有漏仙。兀兀三杯醉。世上無眼禪。昏昏一枕睡。雖然沒交涉。其奈略相似。相似尙如此。何況真個是。汴人劉酒者。無名字。人卽以酒呼之。已

亦以自名。能畫人物。賣畫得錢。則與酒家。余見之七年。無夕不醉。醉中作畫。酒氣拂拂。從十指閒出。嘗乞余顏其草堂。余取坡公語。題曰略似菴。以人間有漏仙。三杯兀兀。世上無眼禪。一枕昏昏。爲楹聯。酒得之。殊自喜。

施愚山瘦齋詩話云。龍濟寺。在吉水城東南。踞東山勝處。蘇長公初到嶺外。曾過此寺。題聯云。天上樓臺山上寺。雲邊鐘鼓月邊僧。手書刻於柱。明末猶存。或曰。此坡老詩中一聯也。惜未見其全篇。

先資政公曰。凡著述一書。無論大部小種。皆須有益於世。有益於人。使讀者有所感發。而興起。乃爲可貴。記得先四代祖司訓公諱珪。雪園雜紀中有一條。真齊家寶訓也。其言云。前明南京禮部尙書餘姚孫忠烈公懋。殉宸濠之難。其子文恪公陞。續娶楊夫人。花燭日。前妻三子鑿鍾。匿不出拜。文恪甚怒曰。我家一

門忠孝。今無禮若此。非吾子也。使家人覘之。則皆在書塾中相持而哭。楊夫人親往塾中見諸子。喜曰。他日皆大器也。文恪怒爲之解。文恪訓子嚴。尋常不得出書塾。每晨至門首。加鑰而去。一日楊夫人偶至其處。自窗隙潛窺。三子皆不在其中。而門扃如故。乃開門入視。最後見壁上懸一畫。畫後一門通焉。察之。則並未外出。乃各與其妻聚談耳。楊夫人亦不語。惟手書一聯懸於壁云。愛惜精神。留此身擔當宇宙。蹉跎歲月。將何日報答君親。諸子見之。皆發憤。後皆顯達。其季子鑿。楊夫人所出。世所稱月峯先生者。官尙書。亦母教也。

周樸園閩小紀云。侯官林太守春澤。正德甲戌進士。爲戶部主事。疏諫南巡。遷員外郎。以司藏失盜。鐫秩。復歷南京刑部郎中。出知松番府。免歸。公生於成化庚子。至萬曆己卯年百歲。有司建人瑞坊。子應亮。以戶部侍郎侍養。亦年七十矣。起拜。矍鑠如壯年。應亮子如楚。工部侍郎。公嘗率少司農。少司空。田中觀耘。鄉人立碑紀之。一時以爲盛事。其大門有自撰楹聯云。四十登科。甲戌還登甲戌榜。五旬生子。長孫又抱長孫兒。至癸未十月卒。年百有四歲。其百歲時。猶生一女。適雲南督學鄧原岳。三代進士。五代同堂。一時有東西林之稱。東林居林浦。卽三代五尙書之家。西林居南嶼。卽人瑞翁宅也。

雪園雜紀云。林浦林家。有七科八進士。三代五尙書之稱。林文安公瀚。爲第一代尙書。子二。康懿公廷楫。文僖公廷機。文僖子文恪公懋。及其弟煊。亦俱接武爲尙書。祠堂中有一聯云。國師三祭酒。宮保五尙書。羅景綸大經鶴林玉露云。杜成己爲相。以日見賓客。疲神妨務。無益於事。乃不復見客。但設青櫃於門。有欲言利害者投之。越旬日。並櫃撤去。有題一聯於府門者曰。杜光範之門。人將望而去矣。撤暗投之櫃。我且卷而懷之。夫題門者薄矣。而成己此舉。亦未之思也。

陳白沙先生行狀。載有李某。妻糧自嘉魚數千里。從學白沙。凡二年。先生服食行纏。待之如子弟。後築楚雲臺以居之。臺榜一聯云。有月嚴光瀨。無金郭隗臺。其欲來天下之善蓋如此。

施愚山矩齋雜記云。董思白。陳眉公。以詞翰相推重。董年八十五。臨終。索婦人紅衫絳縵爲服。陳年八十

三將逝之前。辟穀數日。盛爲詩歌。以書別親友。仍自題一聯云。啓予足。啓予手。八十年臨深履薄。不怨天。不尤人。三千界魚躍鳶飛。擲筆而逝。亦可謂了然於去來者矣。

又家風輯略云。天啓丁卯閒。余季父祇園公。受知於督學使者賈侍御。補邑諸生。先考述明公贈之楹聯云。誦鼎上辭。長願景行正考父。任天下事。可能遙揖范希文。其相勸之意深矣。

陳眉公繼儒見聞錄云。翟公變嘗自製對聯云。靜亦靜。動亦靜。五臟剋消。夫慾火。榮亦忍。辱亦忍。平生不履於危機。常孰嚴公訥輔政時。封公尙在。其門聯云。堂上雙親壽。朝中一品家。申公時行。解相印歸。其堂聯云。無毀無譽。三代直道而行。知止知足。四時成功者退。陸文裕公在京邸中。則榜世廟御撰一聯云。抑人是自抑。揚人其自揚。都城鄭宮保敬庵諱紳者。以工部尙書告老。其堂聯云。世多君子扶皇極。天放閒人養太和。翟中丞諱鵬者。其堂聯云。徒有寸丹懸帝闕。竟無尺素達權門。王中丞璣。更號六陽山人。嘗榜其堂曰。偶爾謝上天富貴。歸來作平地神仙。又有天上有人扶日月。山中安我老漁樵。吾鄉包公節與弟孝。以兄弟進士。爲南北兩臺。其門聯云。兄進士。弟進士。一天雨露。南御史。北御史。兩地風霜。湯東谷廳事春聯云。東坡居士休題杖。南郭先生且濫竽。後廳曰。片言曾折獄。一飯不忘君。蓋東谷嘗從興濟伯楊忠定公奉迎鑾輿。故云。其東偏曰。暫拄西山笏。閒開北濟尊。其西偏曰。長身唯食粟。老眼漸生花。豪俠之氣。可以想見。

前輯楹聯叢話中已採入周碑金陵瑣事茲覆閱之尙有三條可補入者如云太祖賜駙馬梅殷府門春聯云人間塵俗不到處闕下恩榮第一家又云成祖殺方孝孺於聚寶門外有門人廖鏞廖銘檢其骨葬之不封不樹莫可認識今諸搢紳立方祠於永甯寺後山又聚土爲墳上海徐鯨刻一聯於華表云十族遺骸埋聚寶千年孤塚表長干又云有士人因病出神入閻羅殿記得殿中楹柱一聯云是是非非地明明白白天

興化府志云正統間東鄉王常字大經以御史言事左遷知莆田縣事政務嚴明嘗書聯署楹云牧民猶帶舊風霜見者咸以爲佳其妻黎氏通書史語常曰風霜御史職也君今出牧奈何專尙嚴乎請易猶帶二字曰無事何如常欣然遂改之

甯德縣志云主簿丁大全因旱令人以銀瓶乞水於百丈龍潭取之得瓦瓶歸大全疑之復造銀瓶躬往投之又得瓦瓶大全祝曰龍神有靈若吾後當顯貴幸示靈異潭中果露龍爪大全後登宰府奏封龍王架石爲亭題聯云龍從百丈潭中起雨向九重天上來今亭址猶存

相傳明末倪鴻寶詣呂晚邨呂揭一聯於堂楣云囊無半卷書惟有虞廷十六字目空天下士只讓尼山一個人後呂詣倪倪亦揭一聯於堂云孝若曾子參纔足當一字可才如周公且容不得半點驕兩人之優劣見矣

孫柳君孝廉衍慶辛廬隨筆云。前明嘉靖間。湖州潘時良司空季馴。最敬關帝。督南河時。有二蛟爲患。公夢帝許助以神力。遂斬之。今蛟首一在高家堰關帝廟中。一藏公家。每歲於昆山麓祀帝時。必陳之。當毘山廟落成日。衆擬撰楹聯。未就。忽一素不識字之田夫。入座提筆。大書漢壽亭侯廟五字扁。又署楹聯云。悠悠乾坤共老。昭昭日月爭光。十二字。不署款而去。人或追問之。則自云。不知所爲也。書體絕似虞永興。今猶存廟中云。

王漁洋隴蜀餘聞云。劉以平字近塘。猗氏人。爲諸生時。夢入宮殿中。有王者命坐對弈。又至一所石門。懸聯句云。鸚鵡能回千載夢。麒麟空臥萬年秋。不解所謂。旣登進士。爲潞王府官。王敬禮如賓師。遷陝西行太僕卿。過武后墓。墓上石刻一聯。卽夢中所見也。

又香祖筆記云。廣州城南長壽庵。有大池。水通珠江。潮汐日至。池南有高閣。甚麗。可以望海。其下曰離六宮。主僧某。乞余製爲楹聯。余題句云。紅橋映海三更月。石澗通江兩度潮。紀實景也。又云。康熙時。上駐蹕杭州。時山陰耆民王錫元。同胞兄弟五人。見於行宮。長次係雙生。皆年八十歲。三者七十八歲。四者七十六。五者七十五歲。率子姪凡十七人。孫十八人。賜宴賜緞。又賜扁額云。一門人瑞。皇太子賜聯云。五枝錦樹榮今代。百秩仙籙萃一門。

鈕玉樵曰。若中吳磐家。饒於賞工書博學。甲申後。絕意進取。學使者張安茂。題其居爲才人節士之廬。然

負氣甚高。未能韜晦。順治中。官方山。備兵吳興。與之友善。因重修逸老堂。乞其長句一聯。鐫懸堂柱。吳走筆書云。山川無恙。歎前輩風流何處。但古道斜陽。冷煙衰碣。儘悲涼人物。止剩寒鴉。臺閣重新。問蒼穹英雄誰是。有補天巨手。回日瑀戈。待整頓乾坤。再來杯酒。詞旣悲壯。書復蔚跂。有怨家潛錄其語。以吳陰蓄異謀。首之帥府。禍幾不測。方山知之。乘夜撤去。力爲回斡。費千餘金。事乃已。

秋燈叢話云。夏太史力恕。孝感人。康熙庚子。夢謁關帝廟。帝諭之曰。廟聯多不愜余意。如三分忠義等字。適足增余痛。好另爲作對。將元爾矣。授以巨筆。夏書云。英雄幾見稱夫子。豪傑如斯乃聖人。帝稱善。醒而識之。遂謹鐫板而懸於廟。是科鄉試。果第一。按英雄十四字。熟在人口。而不知其出於夏也。

茶餘客話云。孫藩使舍中。太翁爾周宰浙時。獨行杭州城外疏村中。一望土冢纍纍。見粉牆。卽往索茶。一小婢。舉竹椅出。令坐。捧苦茶一盞飲之。須臾去。呼之不出。見門上一聯云。兩口居山水之間。妻忒聰明夫忒怪。四面皆陰磷所聚。人何寥落鬼何多。嚴問樵曰。此歸元恭所自署。聯云。兩口寄安樂之窩。妻太聰明夫太怪。四隣接幽冥之地。人何寥落鬼何多。

鈕玉樵曰。故友王師石。嘗言嘉靖丁清惠公。爲南畿操江時。巡視郭外。偶過刻字店。顧指左右呼其人來。而肩輿已行。閱三日。中軍押一人投之階下。曰。刻字店主到。公已忘之。熟視良久。曰。汝店所刻扁字。筆畫有訛。呼汝令改耳。無他也。其人自公呼。隨被銀鑑鎖至軍府。迨三日後還家。中人之產。已費其半矣。是知

慎爾出話爲民上者尤所宜慎。子他日學成而仕。尙其念之。故余宰白水。題一聯於後堂云。丹毫一點。乃吾民利害攸關。須念悖出必將悖入。白日三竿。卽爾室公私畢照。莫謂知顯不在知微。念故友之箴言也。紀文達師閱微草堂筆記云。明永樂二年。遷江南大姓實畿輔。始祖椒坡公。自上元徙獻縣之景城。子孫繁衍。析居崔莊。在景城東三里。今土人以仕宦科第多在崔莊。紀不過舉其盛耳。而余族則自稱景城。紀不忘本也。椒坡公故宅。在景城崔莊間。兵燹久圯。其址屬族叔蔡庵家。蔡庵從余受經。以乾隆丙子舉鄉試。擬築室移居於是。先姚安公爲預題一聯云。當年始祖初遷地。此日雲孫再造家。後室不果築。而姚安公以甲申八月棄諸孤。卜地惟是處吉。因割他田。易諸蔡庵而葬焉。前聯如公自識也。又云。劉念臺先生官總憲時。題御史臺一聯云。無欲常教心似水。有言是覺氣如霜。

蔡佛田鴻達紫荊樹館雜著云。康熙間。蔡屏山王楨。由內閣中書。改四川仁壽縣令。當謁選之初。夢至一所。左右皆遭火燬。復歷荒草頽垣中。則關聖帝像在焉。肅拜畢。仰觀楹間有聯云。打開義利關。具見英雄過人氣概。參透天人路。便是聖賢行。己工夫。此壬辰春事。迨乙未莅縣事。一如所歷。適士民修廟工竣。因書前聯以獻云。

袁簡齋曰。吳江徐布衣蠶胎。有權奇侷儻之名。余嘗訪之於吳下。年近八旬。語猶風生泉湧。所居隣太湖七十二峯。招之可到。署其門云。一生那有真閑日。百歲仍多未了緣。又預營生墳。自題其墓門云。滿山靈

草仙人藥。一徑松風處士墳。

祖舫齋師曰。前明葛屺瞻。黃亮督學吾閩。士林頌之。官至少司農。甲申後。樂浦城山水之美。避居於此。四方耆宿。日來造訪。自署其門云。豈有文章驚海內。漫勞車馬駐江干。州府屢勸之入都。遂閉門不出。李劍溪太僕光雲曰。吾鄉京宦前輩。有延師課子者。於本宅近處。另闢精室一區。聽館師出入自便。乃其師好嬉游。無日不到城外戲園中聽劇。同鄉知好。有訪之者。十有八九不得晤。因新歲換寫桃符。何念修少宰逢僧。適知其事。因戲書一聯懸於門云。園日涉而成趣。門雖設而常關。次日館師見之。卽撲被而去。

應制

繆蓮仙良塗說云。乾隆四十五年。七旬萬壽時。聖製有七旬天子古六帝。五代孫曾予一人之聯。其時臣工之撰燈聯者。皆敬本此意。以爲闡釋。誠千載一時也。謹按漢世宗孝武皇帝。在位五十四年。壽七十一歲。梁高祖武皇帝。在位四十八年。壽八十六歲。唐高宗神堯皇帝。在位九年。壽七十一歲。唐元宗明皇帝。在位三十二年。壽八十歲。六帝皆年踰七十。若五世同堂。則曠古帝王所未有矣。豈不盛哉。

朱絨三孝廉乘銘曰。聞乾隆五旬萬壽時。京師經壇有聯云。四萬里皇圖。伊古以來。從無一朝一統。四萬里。五十年聖壽。自茲以往。尙有九千九百五十年。氣象高闊。設想奇創。對仗亦新而穩。與尋常楹聯蹊徑迥乎不同。相傳爲紀文達公所撰。否則必屬彭文勤公。他人無此手筆也。

黃霽青太守安瀾曰。乾隆甲辰高宗南巡。浙江杭城人家。有懸桃符者。句云。一歲雙春三月閏。六巡兩浙萬民歡。又五十五年。恭遇八旬萬壽。民間有頌聯云。自古罕聞聖天子。八旬萬壽。於今方見大皇帝。五代一堂。兩聯語意雖質。卻極自然穩貼。可以見草野芹曝之忱。

程春廬曰。乾隆五十五年。恭值八旬萬壽。京中有一經壇燈聯。極典麗。又極渾成。竟如天造地設者。句云。八千爲春。八千爲秋。八方向化。八風和慶。聖壽八旬逢八月。五數合天。五數合地。五世同堂。五福備。正昌期五十有五年。相傳是河間紀文達公手筆。蓋信非吾師不能也。

鄭仁圃太守瑞麒曰。嘉慶己巳。恭祝五旬萬壽。福州經壇。設在鰲峯書院。余曾擬一聯云。沙數恆河。合十佛。稱無量壽。潮音大海。呼三聲。協不周風。又擬戲臺聯云。曲譜四詩。天保九如篇第一。舞分兩向。太平萬歲字當中。時院課卽以此命題。余此兩聯。曾爲游彤卣師錄用。至己卯。恭祝六旬萬壽。經壇亦設鰲峯書院。所有燈聯。俱周蒼士廣文。嘉暨擬作。如云。屆二十四年。初週斗極。祝萬八千歲。遠紹天靈。又云。如大海潮音。衢歌祝聖。比恆河沙數。壽寓添籌。又云。呼萬歲者三。康彊逢吉。等百王而上。福祿來崇。又云。帝命式九圍。俾緝熙于純嘏。皇斂時五福。用敷錫厥庶民。又云。功旣成矣。世旣貞矣。參天貳地。鬻乎鼓之。軒乎舞之。蹈德詠仁。按乾隆年間。兩次慶典。經壇燈聯。聞俱係陳秋坪登龍。黃耦賓世發。張燮軒經邦。及吾師鄭蘇年光策。林暢園茂春。諸先生所擬。余少時尙見先大父手錄成本。極其壯麗喬皇。今此本不知何時

失去。屢向他處訪覓副本。杳不可得。惜哉。

道光辛丑八月。吳郡紳士於元妙觀。恭設經壇。祝六旬萬壽。時朱蘭坡侍講。瑋方爲紫陽書院山長。撰次燈聯數付。具見精思。如云。六位仰時成。六龍御世。六風儀廷。聖德備膺九五福。十華徵券錫。十賚孚恩。十全繼績。慈闈懽溥萬千觴。此於每句分嵌六十兩字也。又云。元符根太極。五百歲爲春。五百歲爲秋。春秋筭協福壽。八葉椿開無量壽。妙果證長生。三千年一花。三千年一實。花實數周星紀。九重桃獻大羅天。此於首句分用元妙兩字也。又云。大地歡臚殷庶道。統際重熙。六葉升恆。萬國萬年長拱極。清時盛譜和聲。光天歌復旦。十華紉縵。壽星壽寓徧騰輝。此每句首一字。合成大道光六十萬壽也。又云。八音節。八風和。月輪正滿。十瑞臻。十章獻。日馭方中。此兩聯中分用八月十日字也。

廟祀

蘇州泰伯廟中。無佳楹帖。惟齊梅麓彥槐。有題泰伯墓柱一聯云。志異征誅。三讓兩家天下。功同開闢。一坏萬古江南。語殊壯闊。曾見近人筆記。亦載此聯。脫卻志異功同八字。又以爲齊眉樓所撰。殊可笑也。安溪李文貞公。爲直隸巡撫。祈雨於關廟。有應。謝以聯云。我意祈麥秋。澤隨地徧。公靈震華夏。日在天中。按此切事成文。而麥秋華夏。對仗自然工穩。語亦正大相稱。

常州荆溪縣。有關帝廟。楹帖皆不佳。齊梅麓作宰時。易以新聯云。威鎮雄州。野樹尙含荆浦綠。神游故國。

夕陽偏照蜀山紅。荆浦蜀山皆縣中地。關合亦尙渾成。又撰一聯云。志在春秋。孔聖人未見剛者。氣塞天地。孟夫子所謂浩然。頗得意。然余終嫌志在春秋語。非正史所有也。

黃右原比部疏曰。記得關廟聯。尙有兩家可錄者。忘爲何人所撰。一云。王業不偏安。拒操和權。諸葛猶非知己。春秋大一統。帝蜀寇魏。紫陽乃許同心。一云。生蒲州。輔豫州。保荊州。鼎峙西南。掌底江山歸統馭。主元德。友翼德。仇孟德。威鎮華夏。眼中漢賊最分明。按原本作兄元德。弟翼德。近於演義。陳壽志雖有義同兄弟之語。並無孰兄孰弟主名。改本較爲妥協。

趙甌北有關廟聯云。乃聖乃神乃武乃文。扶四百載承堯之運。自西自東自南自北。如七十子服孔之心。余於聯話前編偶遺之。

浦城西陽嶺上有關廟。邑人朱絨三孝廉有一聯云。至誠之動。孚及豚魚。雖阿瞞莫敢不服。大義所歸。堅如金石。惟使君乃得而臣。孝廉之子春門茂才篋亦獻聯云。前杜氏而好春秋。仗義宣威。此老原非徒左癖。後岑侯而鎮荆楚。奉詞伐罪。彼蒼何忍聽彭亡。詞氣並岸異不凡。

朱蘭坡曰。關廟聯多用生前事。遂成俗套。余曾擬製一聯。但言尊崇顯赫之意云。帝爽有昭明。當朝謚號增崇。奉戴儀同文廟。肅神功無代謝。亘古河山作鎮。靈長運過蔣侯奇。按此與吾鄉龔海峯先生所撰。命意正同。可謂異曲同工。不落窠臼者矣。

蘇鯨石廷尉廷玉曰。涿州張桓侯廟聯。多狀其雄糾語。究屬莽夫氣象。於尊崇之義未合。惟方葆巖維何作直藩時。有聯云。使君乃天下英雄。誼同骨肉。壽侯爲人中神聖。美並勳名。以先主關帝兩人夾出。恰稱身分。按帝曾封漢壽亭侯。壽侯二字。似未協。尙應酌易也。

四川成都城外。有丞相祠堂。楹聯林立。鄂潤泉督部鄂山聯云。望重南陽。想當年羽扇綸巾。忠貞扶季漢。澤周西蜀。愛此地浣花濯錦。香火擁靈祠。又蔣礪堂節節銛聯云。曰宮曰殿曰幸且曰奔。詩史留題千古猶存正統。書吳書魏書漢不書蜀。儒臣特筆三分豈是偏安。

四川寧遠府有丞相祠。戴美門督部三錫聯云。籌策在攻心。當年化洽賓幃。冠帶百蠻歸典屬。安邊曾叱馭。此日風清甌脫。雲霄萬古仰宗臣。聞是湖南湘鄉令嚴麗生學漁代撰。嚴本才士。搖筆故自不同。又聞嚴麗生作湘鄉縣龍王廟聯云。春耕夏耘。秋收冬藏。萬物育焉。鬼神之爲德。雷出地奮。雲行雨施。百室盈止。膏澤下於民。亦可謂取鎔經義。自鑄偉詞者矣。

蘇郡文昌宮之旁。有太陽宮。向不入祀典。亦不在朔望行香之列。道光十一年。霖雨數十日。郡人士始請余詣禱。升香之日。旋即暢晴。後卽定爲常祀。齊梅麓爲之聯云。光天開糺縵之祥。雨非恆雨。陽非恆陽。二十四氣成四時。羣生並茂。化國衍舒長之祚。朝不廢朝。夕不廢夕。三百六旬有六日。庶績咸熙。又撰風神廟聯云。龍虎忌爭行。廿四番花信吹餘。致雨興雲。勿張旗鼓。豚魚占利涉。七二候箕神簸後。飛駕輓粟。

好送帆檣。時以狂風匝旬。礙漕運。率屬虔禱有應。故以此爲報云。又撰龍神廟聯云。九土足農田。但期宵不下屯。霖雨徧敷天下望。三吳稱澤國。吏願流無旁濫。江河長向地中行。

鄭仁圃喜爲楹聯。時見意匠。有題天后宮聯云。補天媧神。行地母神。大哉乾。至哉坤。千古兩般神女。治水禹聖。濟川后聖。河之清。海之晏。九州一樣聖功。想見精心結撰。思與神通也。

楊飛泉郡丞鶴書。會知雲南師宗縣。後由浙省委辦銅差。復至滇中。題天后宮一聯云。三十年宦海平安。旦夕焚香。惟求利濟。一萬里慈雲庇蔭。閒關行役。重許瞻依。

四川灌縣城隍廟。有蔡佛田手題聯云。聰明正直之謂神。清夜焚香。惟願斯民敦孝弟。雨暘寒燠以成歲。豐年報享。長期列部頌昇平。又成都府城隍廟戲臺聯云。善惡報施。莫道竟無前世事。利名爭競。須知總有下場時。恰是城隍廟戲臺。不能移易他處。

蔡佛田曰。佛寺聯語極多。記得有二聯。語極雋永。句云。願將佛手雙垂下。摩得人心一樣平。又云。彈指聲中千偈了。拈花笑處一言無。

明邛州人余昂有題海會寺聯云。終日解其頤。笑世事紛紜。曾無了局。經年坦乃腹。看胸懷灑落。卻是上乘。按此聯詞旨超脫。似比吾閩鼓山寺一聯。較爲雅馴。

福州有慶城寺。中有鐵佛一尊。極其雄偉。係僞閩時所鑄。廟中有前明曾弗人異譚。一聯云。古佛由來皆

鐵漢。凡夫但說是金身。雋永有味。陳畏民筆談。徐价人閩游詩話。並載其語。惜余未得見其聯。

蘇州光福。有觀音大士廟。祈晴禱雨最靈。林少穆巡撫三吳時。題聯云。大慈悲能布福田。曰雨而雨。曰暘而暘。祝率土豐穰。長使衆生蒙樂利。諸善信願登覺岸。說法非法。說相非相。學普門功德。祇憑片念。起修行。又因督濬劉河。小憩劉河鎮之天后宮。題聯云。八百年寰海昭靈。滌涓嶼飛昇。九牧宗風。榮廟祀。四萬頃。具區分派。喜婁江新濬。三吳水利沐神庥。又題上元縣署中程明道先生祠云。愛物爲心。一命於人。亦有濟得民以道。千秋斯統不虛傳。又題福州文藻山朱文公祠云。道統闡薪傳。洙泗真源今未墜。儒型垂梓社。滄州精舍此重開。又題嘉定縣歸震川先生祠云。儒術豈虛談。水利書成。功在三江宜血食。經師偏晚達。篤家論定。狂如七子也心降。

桂林城外有臨水文昌閣。極明瑟之致。朱勳楣觀察聚題聯云。水月盡文章。會心時原不在遠。星雲燦魁斗。鍾靈處定非偶然。

朱子生於延平之尤溪。故小字沈郎。沈水名。卽尤溪縣。亦因此得名也。後人皆誤以朱子字沈郎耳。其地有公山文山。朱子誕生之日。兩山俱發火光。現出文公二字。今就其地建文公祠。周力堂學使學健撰聯云。前公山。後文山。一氣蜿蜒。知天地精華所萃。始小學。終大學。真源脈絡。統聖賢體用之全。塗說云。江南侯竹愚先生在粵時。嘗題韓文公祠楹帖云。蘇學士前傳謫宦孟夫子後拜先生。殊工切。

漢口有桃花夫人廟一聯云。列女傳從劉向定。夫人心祇息侯知。議論自在言外。惜不知何人所作。虞山有白蘇二公祠。齊梅麓卽集白蘇語爲楹聯云。中有仙龕虛一室。更邀明月作三人。上聯香山句。下聯東坡句也。跋云。香山詩。近有人從海上來。海山深處見樓臺。此海虞立白公祠之公案也。虛一室。固待公也。自公言之。卽謂待坡公也可。又坡公題樂天身心問答三詩後云。而今月下三人。他日當成幾佛。以更邀明月句。移奉白蘇二公祠。頗有根據。非同泛語也。按常熟縣之白蘇二公祠。建於道光丁酉年。在昭明讀書臺之側。董其成者。蔣伯生因培。楊芸士文葆也。芸士爲之記。

齊梅麓宰官興時。撰周孝侯廟聯云。朝有奸黨。豈能成將帥之功。若教仗鉞專征。蛟虎猶非對手敵。世無聖人。不當在弟子之列。誰信讀書折節。機雲曾作抗顏師。詞意激昂。可當一首周處傳論。

甘露寺中有三賢祠。不知建於何時。祀唐李文饒。宋蘇東坡。米海嶽三公也。李蘭卿撰聯云。溯後先三百載游蹤。異代同堂。能結有情香火。冠今古第一流人物。文章事業也。如無盡江山。

謝默卿曰。無錫惠山之麓。有張睢陽廟。額曰顯忠。余莅任時。適邑人修建落成。請爲楹帖。因撰句付之云。抗節濟時艱。論當年守禦聲威。實先郭汾陽。李臨淮。功存廟社。顯忠關世教。考茲土。蒸嘗舊典。當與伍子胥。陳武烈。氣壯湖山。按張睢陽。伍子胥。及隋司徒陳杲仁。其事皆不在錫山。而縣中皆有祠廟。香火甚盛。亦可見忠烈祀典。出於秉彝攸好之同矣。

江西九江府有五顯廟。中有一集句聯云：九江孔殷。以享以祀。五人爲伍。乃聖乃神。詞義俱極穩愜。不知何人所撰。俟晤鄭仁圃時詢之。

蠓磯廟聯。思親淚落吳江冷。望帝魂歸蜀道難。人皆知爲徐文長所撰。惟繆蓮仙塗說。謂此與采石磯李太白祠聯云：我輩此來惟飲酒。先生在上莫吟詩。並傳爲徐文長手筆。而余經過二地。得見二聯。皆無文長題款。惟署谷口鄭篋書。後開蠓磯聯爲方茶山先生體感夢而作。仍疑莫能明也。按方茶山年代甚近。而此聯熟在人口。實出茶山之前。後說恐仍是因文長事而誤演耳。

金龍四大王。爲北方河道尊神。廟中楹聯。鮮有傳者。惟齊梅麓一聯尙壯麗。句云：志節慕睢陽。憂國讀書。尙記金龍山在。英靈同伍相。飛芻輓粟。正須白馬潮來。

錢棣溪曰：唐張旭曾爲常熟縣尉。故縣城南有草聖祠。今爲文廟土地之神。新立一祠於大成門之右。廣文尉余書一聯。一額。余曰：聯句尙易。額甚難也。再四思之。總未題就。偶憶韓文公優入聖域四字。因書付之。並撰一聯云：書道入神明。落紙雲煙。今古競傳八法。酒狂稱聖草。滿堂風雨。歲時宜奠三杯。或嫌三杯字。太涉廟祀套語。余應之曰：杜詩張旭三杯草聖傳。豈忘之耶。海州板浦。爲濱海斥鹵地。自道光年間。陶雲汀宮保。改行票鹽。民販趨之如市。蕃昌殷賑。儼然一都會焉。宮保按部海州。兩駐其地。登雲臺山。並於山中建陶靖節祠。今商販居民。又合詞籲建陶文毅公祠。謝默卿撰長句楹聯云：改釐法。近悅遠來。試觀

淮浦連年浩浩穰穰。豈惟追齊相夷吾。府海功施稱再造。薦鮒馨。春祈秋報。况對郁洲勝境。熙熙皞皞。真可繼晉賢靖節。名山祀典配三元。

成都北門外歡喜庵。奉德將軍楞秦像。係乾隆金川凱旋時。爲士民所建。楹聯云。萬里版開圖。雲棧星郵。往來下拜功臣像。百蠻碑在口。渝歌寶舞。歡喜常存故老思。又冠履肅丹楹。似丞相祠堂。柏鬱森森承雨露。聲威通紫塞。憶將軍幕府。旌揚熠熠壯風雲。旁爲得勝庵。卽阿公祠。同時所建。聯云。纒井絡以界坤維。天府奧區。皇極會歸。雄帶礪。控荆蠻而引秦隴。巖疆重任。臣心寅畏。凜冰淵。

朱蘭坡曰。宛陵城內有東平王廟。祀唐張睢陽。余少年應試時至其處。見一楹帖云。祿山慶緒。悍然其無君父。當年卽破孤城。効忠亂賊。曾邀富貴之幾時。令狐尹奇。不幸而有子孫。今日試登雙廟。下拜先生。將置祖宗於何地。余最喜其詞氣激昂。今約五十餘年。猶識不忘。但不記爲何人所作耳。

涇縣會館中奉朱文公木主。朱蘭坡爲題一聯云。刪定贊修。直千古同功。較漢唐詰諸儒。仰高山而倍切。德性問學。原兩端並舉。任陸王紛紜異說。撼大樹以何能。朱文公聯語亦多。無如此之沈著穩括者。閩浙分畺之處。爲楓嶺。俗呼爲五顯嶺。實卽梨嶺。古稱梨嶽。祀唐太守李頻。李蘭卿題聯云。地是名山宜廟食。民思賢守本詩人。五顯廟中楹帖極多。皆遜此之雅切也。

黃右原曰。相傳藥王廟戲臺聯語。一切戲。一切藥。頗有慨乎其言。上聯云。名場利場。無非戲場。做得出潑

天富貴。冷藥熱藥。總是妙藥。醫不盡偏地炎涼。按潑天富貴。仍是從藥王廟生情。非泛泛戲臺語也。呂月滄郡丞璜曰。宋梅生觀察鳴琦。撰桂林城隍廟聯云。地獄卽在眼前。莫到犯了罪時。方纔省悟。業鏡雖懸臺上。只要過得意去也。肯慈悲。又齊梅麓撰宜興城隍廟聯云。時雨時暘。玉女銅官皆有慶。好人好事。橋蛟山虎總無驚。宋作係仁人之言。齊作爲才人之筆。

吾閩有石佛嶺。佛像係就大石琢成。陳望坡尙書未第時。將棄舉業。過此嶺求籤。詞意許其必遇。三過三問。皆一籤。貴後乃獻一聯於寺云。心到虔時佛有眼。運當亨處石能言。信乎佛之能前知也。嚴問樵保庸曰。吾鄉出痘。謂之出果。種痘。謂之種苗。余嘗撰痘神廟楹聯云。一點心苗。汝那裏好生培養。十分善果。我者邊總肯周全。

柳州柳侯祠聯句。前集已載數家。而愜心者殊少。近聞伍實生撫部長華觀察右江時。曾集柳文成句爲聯云。潔廉爲心。忠信爲仗。文章在冊。功德在民。十六字頗典重。而至今尙未懸挂。不知何故。

楹聯續話

卷二

解字

徐州府爲古彭城。今爲河漕重地。專設監司筦之。蓋兵備道而兼筦河防者也。宛平張觀察鼎。自撰道署楹聯云。地當黃運之中。水欲治。漕欲通。千里河流。涓滴皆從心上過。官作軍民之主。寬以恩。嚴以法。一方士庶。笑啼都到眼前來。又武威孫太守治。自作府署楹聯云。官有典常。任一日。則盡一日之心。况兼地廣事繁。敢不夙興夜寐。民供正課。寬幾分。則受幾分之惠。縱使時豐歲稔。常如怨暑咨寒。皆不失仁人之言。勝於揆張形勝者矣。

揚州厲氏舊族也。其宗祠柱聯云。二百載青氈。蟬聯八世。兩三間白屋。鶴隱千秋。聯係史望之尙書所書。其句則未詳孰撰也。

戴葭塘歸藤陰雜記云。護國寺西。先爲桐城張文和公第。後改西華門內。此第遂以賜溧陽史文靖公。余癸未出錢塘王文莊公門下。曾於此第謁見。有江山勝地皆行部。臺閣崇班半屬僚之聯。

京師正黃旂官學中有楹聯云。業精於勤。修其孝弟忠信。學優則仕。以爲黼黻文章。蔡研田本俊曰。安溪李文貞公宅。有小園。自集句爲聯云。有水園亭活。無風草木閒。

彭芝庭啓豐自訂年譜云。余曾三任浙省學政。因在貢院題聯云。蓉鏡重開。漫向湖山尋舊迹。桂枝擢秀。相期月旦識真才。

浙江學署。面對吳山。右鄰郡庠。西出湧金門。卽西湖也。劉金門先生。題大堂聯云。使節壯湖山。東南壇坫。文光拱奎壁。咫尺宮牆。

黃右原曰。有潤州太守。新修廳事。執贄於吳山尊學士。求作楹帖。學士不假思索。卽對客揮毫。上聯用金山銀山。組織成文云。山色壯金銀。惟以不貪爲寶。以譽太守廉能。觀者歡呼。亟請其下聯。學士率爾操觚。實未有以對也。適幕賓郭香生明經曰。想是江流環鐵石。居然衆志成城。蓋以鐵甕城爲金陵石頭城門名。竟成強對。遂書以應。學士旣服其敏。且有解圍之功。因以所得筆潤分贈之。

揚州羅茗香士琳曰。各省育嬰堂中。有舊傳聯句云。子不子。亦各言其子。委而棄之。是可忍也。孰不可忍也。先王斯有不忍人之政。幼吾幼。以及人之幼。比而同之。有以異乎。曰無以異也。大人不失其赤子之心。集語頗能渾成貫串。惜不傳作者何人也。

謝默卿曰。清節堂始於吳下。由紳士捐建。以居嫠婦之貧苦無依者。經費漸充。規制盡善。各府州皆仿而

行之。誠善舉也。曹良甫比部樛堅。主講泰州時。撰堂聯云。任卹重周官。集一方秉穗餘貧。門題行義。旣幃同夏屋。完幾輩冰霜苦節。臺築懷清。

齊梅麓婺源人。嘗作婺源考棚聯云。漬種必苗。蕪蘭必香。千家茆屋書聲。定有幾枝大手筆。登高自下。陟遐自邇。萬里蓬山雲路。先從一邑小文場。

嘉慶末福州大修貢院。規製恢宏。適林少穆督部奉諱里居。所有楹聯。悉出其手。亦極一時壯觀。精思吾鄉人多能口誦之。如云。皇路許馳驅。舉孝興廉。海嶠人文羅福地。天門同跌宕。蜚聲騰實。蓬瀛才望奮清時。又云。達四門四目四聰。我有嘉賓。莫負文章華國選。書六德六行六藝。烝哉髦士。要兼孝弟力田科。又云。初日照三神山。看碧海珊瑚。盡收鐵網。長風破萬里浪。喜丹霄銀榜。早兆珠宮。又集杜句一聯云。鄉賦念嘉賓。彩筆曾干氣象。持衡留藻鑑。文昌新入有光輝。

王輔銘練音集云。嘉定王丹思敬銘。於康熙丁酉。典試江西。以公慎自矢。嘗題試院協一堂柱云。三條官燭。棘闈辛苦廿年。苟以溫飽負平生。斯誓有如江水。一介儒冠。玉署光榮兩世。能取文章報恩遇。此行方識廬山。

嘉慶戊寅恩科。時鄧嶰筠督部。方爲西安太守。值貢院鼎新。曾撰楹聯數十對。皆極結撰之工。陝中爲之紙貴。如察院門云。恩湛鸞坡。環海臚歡歌曼壽。名標雁塔。曲江高會洽羣仙。又云。地是周京。廣進吉人歌。

引翼制循漢室。特頒明詔選賢良。大門云。門對南山。看太乙峯高。華國雄文爭氣象。恩迎北闕。值長庚星朗。作人雅化頌龐洪。東大門云。左席羅珍。羣仰星樞來左掖。東門顓俊。試看奎曜麗東垣。西大門云。運際右文。鳳起蛟騰連右輔。門迎西極。星輝雲爛照西京。大觀門云。科重西京。盛世作人徵壽考。躔逢南極。祥暉絢采接文昌。連三門云。地接龍門。多士須聯魚貫隊。恩開虎榜。嘉賓同拜鹿鳴歌。明遠樓云。地重棘闈。看雲裏翬飛。四面軒窗增壯氣。輪圓桂殿。聽月中舞羽。一番鼓吹接仙音。又云。樓起層霄。是明目達聰之地。星輝文曲。看筆歌墨舞而來。至公堂云。戊茂協善莪。璧月圓時同壽寓。寅清收杞梓。璠雲多處朗文星。又云。恩被賢良。聽天語鸞銜。朵殿絲綸承北極。科聯甲乙。喜人文鵲起。辟雍鐘鼓振西京。此以戊寅恩科四字冠首也。精白堂云。函關東。玉關西。萃兩省人文。手提珊瑚。使星內。台星外。合一時宗匠。心澈冰壺。又云。精白一心。入手恍聽蠶食葉。丹黃萬卷。到頭佇看鹿銜華。衡鑒堂云。典重求賢。蕩節分持宣漢詔。堂開顓俊。輶軒親到探秦風。監臨堂云。地鎮中權。看露冕宣風。玉鑑冰壺同朗照。才登上選。聽霓裳咏月。祥麟威鳳共騰輝。內簾云。岌業龍門。雷浪可容輕躍過。分明蟾窟。霓裳未許竊聽來。又云。擔弛戴星。且共岑岑吟夜月。文披垂露。便看玉筍坐春風。收卷所云。稱心好句欣先覩。入手奇文豈漫藏。彌封所云。姓氏不妨借豹隱。光芒終許看龍騰。臚錄所云。絢采文疑堆錦繡。研朱筆合架珊瑚。對讀所云。顧誤辨訛須守黑。分章析句合塗黃。按此外尚有兩主考。及提調監試各聯。皆各切其

人之官階科分里貫言之。移地移時。俱不適用。茲不俱錄云。

林少穆督部。總制兩廣時。海禁方嚴。督部於城外新建一演武廳。精選督撫兩標勁卒數百人。親往督操。自題廳柱一聯云。小隊出郊。柯願七萃功成。淨洗銀河。長不用。偏師成壁壘。看百蠻氣懾。煙消珠海有餘清。

鄂城臬署。有鄧嶰筠督部一聯云。官要虛心。總能發伏釐奸。須識我得情勿喜。民宜守分。若到違條犯法。可憐汝無路求生。仁人之言。出乎肺腑矣。

英觀察煥堂。守登州時。構小園既成。屬嚴問樵代撰楹聯云。願他十邑諸公。清風扇野。容我一年四季。明月鋤花。

杭州北新關。較各關尤爲嚴切。商民多裹足不前。阮芸臺師撫浙。兼管關務。自製一聯。懸於關署大門云。上古關無徵。後世不得已。而權關。慎勿失其初意。本朝稅有額。小民如其分。以納稅。何可使有怨言。四川成都將軍署中。有阿文成公題聯云。拱北星辰兼上將。征西部屬半通侯。

四川彭水縣。有摩雲書院。在山半。陶文毅公任川東觀察時。道經其地。書聯贈山長云。化雨無私。憶往歲踏雪來過。曾話春風一席。摩雲有志。願諸生凌霄直上。勿忘燈火三更。蓋公先曾以典試過此也。

蔡佛田撰各憲署官廳聯云。片刻聚談。此地無分賓主。一時摳謁。其間原有後先。又撰巡捕官廳聯云。得

月快爭先。共仰樓臺近水。望風齊向上。欣看冠佩如雲。

齊梅麓居婺源之冲麓。有敦彝堂大祠。自題聯云。得氏營邱。瀆李唐同朝二相。在野三公。下迄宋元明。代有文人光海國。卜居冲麓。看梅里排闥四山。環村一水。甲於皖歙婺。天開圖畫賽瀛洲。又一聯云。大夫不敢祖諸侯。表海雄風。莫問遙遙華胄。途人其初本一體。敬宗收族。當思密密連枝。

朱蘭坡曰。余曾爲同邑江氏祠堂撰聯文云。梁貴胄。唐遺忠。易姓前徽崇一本。歙僑居。涇奠宅。敦宗後嗣。敍三支。蓋江本蕭也。昭明太子之裔。復顯於唐末。以避難改姓。居歙之黃墩。南宋徙涇。總稱黃泥灘江氏。稽其派則有三焉。婺源江氏。慎修先生。實與同宗。人皆不知先生爲蕭姓。余聞諸江石生大令。又代製同邑士氏宗祠聯云。孝友著華宗。遠追竹港遷居。十三枝共聯閩閩。性盛隆。愆祀。新仰松楸旅設。千百世長聚。繫纓。我涇奠有十三王之稱。竹港者。其始居地名。先世曾以孝友聞。又曰。余先世本在蘇。唐末遷歙。復遷婺源。宋代始遷涇。嘗爲宗祠聯云。遷移自吳歙。婺而來。氏族清嘉。斯地奠安。稱梓里。裔嗣踰宋元明。以後。詩書啓佑。幾人騰翥。詠梧岡。又云。茶院溯遙宗。傳三十世有奇。閩巷相聯。敦仁敦讓。李村鄰舊宅。閱百千年無替。歲時並集。奉醴奉盛。茶院公。乃與文公同出之始祖也。初遷涇。居李村。其舊宅已六七百年。尚存。宗祠地正相近。又爲支祠聯云。追古寮六世遷居。中越十傳。森出喬支。綿緒久。歷昭代兩朝。構宇。後垂千禩。蔚成盛族。綰綸多。案古寮。卽茶院公也。六世爲遷涇之祖。拙翁府君。蓋文公之伯曾祖。復十世則

支祠分祖。用鑑府君。子姓獨多。科名仕宦亦較盛。祠宇在本朝。由順治至康熙間始建。數聯雖常語。然非他姓可以移置也。又云。春有心于露。秋有心于霜。遵戴記遺規。欽崇典祀。父之貴者慈。子之貴者孝。式文公懿訓。篤念倫常。此出聯尙可通用。對語本文公家訓。固仍切合矣。

吾鄉林青圃先生。德性嚴重。所作楹帖。亦不肯作尋常語。主鼈峯講席時。曾手書講堂一聯云。坐里門內夕而朝。教不忘就爾事。習君子言尊。以徧學。莫使近乎人。此聯已載前編後陳恭甫編修壽祺亦撰一長聯。意欲媲美前修。而兩小股墨卷時眩。徒成話柄而已。今明倫堂頭門聯云。方千里育賢之地。第一重入聖之門。亦青圃先生所撰也。

有集文選句爲祠堂聯者云。蹈德泳仁。發祥流慶。興廉舉孝。署行議年。又一聯云。秩元祀。禮莫愆。繼禰繼祖。繼高曾。孝思不替。屢豐年。歲其有。奉牲奉盛。奉酒醴。明德惟馨。皆可爲家祠通用之楹帖。

朱蘭坡家有小園甚隘。僅栽桂一株。洪稚存題扁曰。金粟山房。蘭坡自爲聯云。曲彙三弓。庾信有園難拓地。連蜷一本。劉安之樹可留人。

劉松嵐大觀爲州牧時。自題署齋一聯云。袍笏呼來先拜石。管絃麾去獨聽松。爲翁覃溪師書。或云卽翁撰句以贈者。新警通削。使事無痕。殆非吾師不辦也。

蘭溪縣城中。邑令署頭門聯云。明月雙溪水。春風滿縣花。雅切蘭溪而有餘味。惜未詳何人所題。

余於五十八歲請假歸田。在福州黃巷新宅。所撰楹帖。已載入叢話前編。茲於壬寅秋。復引疾得請。僑居浦城。因購得荒地數弓。縛茅架屋。暫爲受廬之寄。時吳事遽。因就舊詞。稍更新意。以存一時情事。云爾。中堂聯云。歷宦海兩朝身。萬頃驚濤仗忠信。借他鄉一廬地。卅年此屋亦辛勤。韓詩辛勤三十又云。安土而能敦。因寄所託。擇鄰焉得智。且住爲佳宅。左有園。額爲北東園。以福州舊宅有東園也。園中有池有樓。池上草堂聯云。客來醉客去睡。老無所事。吁可愧。論學粗論政。疎詩不成家。聊自娛。又一聯云。地價不妨多。明月清風本無價。物情何足校。近水遙山皆有情。此聊紀近事。而借歐陽文忠及蘇子美詩語以解嘲也。又書空中一聯云。平地起樓臺。流寓依然吾土美。著書多歲月。退思未報主恩深。

勝蹟

閩鶴瞿敘粵述云。桂林七星巖下。有壽佛洞。僅容旋馬。內有古壽佛石像云。土人有見老僧者。跡之。至此洞得遺像。遂剝爲菴。楚僧本符號渾融者。建爲棲霞寺。起藏經閣。其下爲靜慧堂。旁爲聽月亭。余有慰賢二字題石。而集唐句爲聯云。白雲回望合。青靄入看無。按今棲霞寺座落。與此所述互異。舊趾紗不可尋。志乘中亦未採此書。而題名與亭聯。更無有能指其處者矣。

無錫北門外。有皇甫墩。在芙蓉湖中。四面皆水。飛樓縹緲。極似西湖之湖心亭。窗戶軒檻。皆九龍山翠所涵演。登覽勝概。甲於通邑。樓中聯榜尙多。惟孫平叔宮保聯云。燈火春星浮北郭。雲霞朝景攬西神。秀整

雅切。邑人盛稱之。西神卽九龍山也。

山陰石屋。在香港峯之半山。有楹聯云。花雨欲隨巖翠落。松風遙傍洞雲寒。錢唐子謙題。見小倉山房詩集。

或傳梅關一聯云。不必定有梅花。聊以志將軍姓氏。從此可通粵海。願無忘宰相風流。按梅關卽梅嶺。又名庾嶺。史記索隱謂相傳以梅將軍名。而南康記又云。前漢南越不賓。遣監軍庾姓者討之。築城於此。因之爲名。則兩說皆可通。南康記又云。庾嶺多梅。亦曰梅嶺。高一千三百五十丈。唐張九齡奉詔開鑿。按張有開嶺路序。又有詩。故嶺巔有曲江祠。此聯穩括大意。而面俱到矣。

林少穆觀察杭州時。曾修孤山林處士祠。又葺梅亭。題亭柱一聯云。世無遺草真能隱。山有名花轉不孤。林少穆有集句題京師陶然亭聯云。似聞陶令開三徑。來與彌陀共一龕。亭中楹帖。當推此爲第一。

費陽城外有岡雲關。不知誰氏一聯云。兩脚不離大道。喫緊關頭。須要認清岔路。一亭俯看羣山。占高地步。自然趕上前人。亦見道語也。

徐修梅茂才汝塘。曾游黔中。錄憶數聯。有飛雲洞聯云。洞關幾時。問孤松而不語。雲飛何處。輸老鶴以長閑。爲天門觀學海所題。又鎮遠大王灘亭聯云。到岸猛回頭。聽灕陽第一灘聲。浪與篙爭。好仗神威資利濟。順流須努力。看黔國萬重山水。峯隨舵轉。全憑忠信涉波濤。

聞福州永福縣之方廣巖。奇景天開。余屢欲往遊而不果。友人江心葵景陽爲述一聯云。石室天開。見大
地山河。三千世界。水簾風捲。露半天樓閣。十二闌干。心葵所居。距巖甚近。余四十年前。卽有同游之約。每
爲之神往云。

九江府庾樓。爲一郡大觀。屹立郡署之後。前襟大江。後枕匡廬。樓額爲蘇齋師所書。江心卽望見之。樓中
聯語多不稱。郡守張子畏寅聯云。如此江山。何幸不才來領郡。亦談風月。每逢嘉興卽登樓。語稍穩。貼尙
不如洪稚存先生亮吉一聯云。半壁江山。六朝雄鎮。一樓風月。幾輩傳人。足與斯樓相稱。鄭瑩圃太守以
爲名下無虛。是也。

余初游平山堂。在嘉慶元年。草草一過而已。後讀曝書亭集。中有鄭谷口隸書平山堂扁長歌。悔彼時不
及留心賞玩。問之曾游平山堂者。亦俱若無覩。道光壬寅初夏。寄居邗上。重登此堂。則前後相距。已四十
餘年。堂中扁字。係歐陽文忠公之款。疑款字甚劣。非歐公所爲。而鄭谷口所題。亦渺不可得。不知何故。徧
繙郡志。則不但無歐陽題扁事。並鄭谷口之扁。亦未載。豈竹垞先生之詩欺人哉。頃與錢梅溪談及。梅
溪乃言。曾親見谷口原扁。後爲吳中徐友竹堅者。易以歐款。記得是乾隆年間第六次南巡時所爲。梅溪
今年八十有四。多見舊事。所言當不虛也。平山堂並無他扁。谷口所題。又易爲歐款。可謂兩失。而伊墨卿
隸書聯句。遂獨出冠時矣。余前編所錄墨卿句。誤隔江爲過江。茲特正之。余亦新製一聯云。高視兩三州。

何論二分月色。曠觀八百載。難忘六一風流。質之阮芸臺師。甚壯其語。朱蘭坡同年亦曰。平山堂詩。以王荆公一堂高視兩三州首爲最。平山堂聯。以伊墨卿隔江諸山十六字爲最。今君此聯出。真可鼎立而三矣。因亦用隸體書就。送懸堂楹。王荆公遠矣。未知墨卿空中笑人否耳。

張伯治曰。揚州大儒坊董祠之左近。有集賢樓。下臨城河。形勝絕佳。記得有一集句舊聯云。桃花潭水深千尺。明月揚州第一樓。不知畫舫錄何以遺之。

前編所載揚州楹帖。多據畫舫錄。比來寄居邗上。新有聞見。亦佳聯也。如陳曼生鴻壽題康山云。春水綠波揚子渡。梅花明月狀元山。洪桐生樞題東門城樓云。風月天高樓臺地迴。雲霞海曙梅柳江春。又題南門城樓云。東閣聯吟。有客憶千秋詞賦。南樓縱目。此間對六代江山。

相傳河南南陽府城樓。舊有楹聯云。真人白水生文叔。名士青山臥武侯。對仗渾成。允稱傑構。或疑諸葛應稱忠武侯。但曰武侯。恐未盡善。然古人二字三字諡。後人止稱其一字者甚多。如衛之叡聖武公。只稱武公。貞惠文子。只稱公叔文子。楚之頃襄王。只稱襄王。秦之昭襄王。只稱昭王。諸葛之稱武侯。亦其例耳。北固山甘露寺之左。舊爲多景樓。俯挹全江。最稱雄勝。樓址久荒。李蘭卿觀察。曾捐資重建。工甫竣。旋圮。觀察撰聯云。天與雄區。欲游目騁懷。一層更上。地因多景。喜山光水色。四望皆通。後曾文荻邑侯承顯就北固山之後。建江東勝概樓。重書觀察聯語。懸諸前楹。而於後楹自撰一聯云。形勢拓南徐。對秣陵樹

色。瓜步江光。何處平分吳楚。畫圖開北固。有米老菴存。衛公塔在。依然映帶金焦樓之右。又有小樓。正對金山。有南昌彭文勤師聯云。兩點金焦。到山者不如望。一菴海嶽。懷古者見其人。蓋寶晉書院。正當其前也。

九江府之南。卽廬山。其城南正對廬山之雙劍峯。歷朝皆於府治前建三層高樓以鎮之。名爲匣劍樓。樓前開二池。直丈餘。橫數尺。名爲匣劍池。鄭仁圃太守初莅任。修濬一新。自製樓聯云。排闥兩峯青。欣輪兔齊雲。環雉堞更上一層。盡見匡廬真面目。干霄千丈紫。恐鋒鋞過露。歛龍光深藏什襲。如羅星宿壯心胸。蘇州許墅關北望亭。卽入金匱縣境。河中舊有豐樂橋。齊梅麓宰金匱時。鳩工重修。蔚爲勝地。因題橋門一聯云。水遠天長。萬古川原連泰瀆。年豐人樂。四時風景勝滌陽。又杭州城外之半山。桃花最盛。花時游船麋集。秋後紅葉。亦極可觀。旁有小橋。橋門一聯云。欲泛仙槎向何處。偶傳紅葉到人間。皆橋門聯之極超脫者。

清江浦勝蹟。以河帥署中爲最。有方池甚寬。上爲荷芳書屋。擅水木之勝。時張芥航河帥。得董思白大字。挂屏十二幅。錢梅溪爲集屏中字作一聯云。大隱寄淮壖。十畝芳塘涵德水。高懷擬綠野。滿園花木繡春風。

成都府城外。有諸葛丞相祠。旁有臺榭。爲大僚飲餞公所。蘇鼈石廷玉集杜句爲楹帖云。諸葛大名垂宇

宙。元戎小隊出郊坰。按此前明黃才伯所集。見朱竹垞靜志居詩話。

唐陶山仲冕有集。唐句題陶隱居祠云。門前學種先生柳。嶺上長留處士墳。

滕王閣中。有裴可亭郡丞。行恕聯云。隔岸眺仙蹤。問樓頭黃鶴。天際白雲。可被大江留住。繞闌尋勝蹟。看樹外煙波。洲邊芳草。都憑傑閣收來。

采石太白樓中。有齊梅麓集句一聯。甚偉。出語云。紫微九重。碧山萬里。卽太白集中句。對語云。流水今日。明月前身。則司空表聖詩品中句耳。

黃右原曰。揚州三賢祠。舊以王漁洋繼歐蘇後。已不甚稱。後更奉伊墨卿太守長生祿位於旁。而議者益起。自裁撤鹽政後。湖上園林。歲修無主。頽廢不堪。李蘭卿樵使。獨能捐廉重修江山文選樓。桃花菴各處。而別建載酒堂於祠側。以祀漁洋。於是香火始正。樵使並爲之聯云。畫了公事。夜接詩人。得句皆堪作圖畫。修禊虹橋。訪碑禪智。此才真不負江山。

自浙入閩。第一重嶺爲蘇嶺。嶺頂有關廟。殿後一亭。境極幽靚。有朱笥河先生手書一聯云。雲石江將疑字浙。風篁嶺若誤髯蘇。跋云。過蘇嶺留句。乾隆庚子十二月廿日。笥河居士朱笥。余每過此。必熟賞此聯。寺僧亦知寶之。寺中又藏有朱文正師詩卷。卽爲此聯而作。和題者有譚蘭楣光祥。及吾鄉林樾亭先生。王蘭陔紹闡中丞。中丞復作長跋紀之。謂此聯句奇而筆適。若有靈氣光怪。足以永鎮山門者。洵不虛也。

黃州赤壁以坡公二賦傳耳其實周郎用火攻處在今嘉魚也人皆議坡公之誤朱蘭坡題聯云勝蹟別嘉魚何須訂異箴譌但借江山撼感慨豪情傳夢鶴偶爾吟風嘯月毋將賦詠慨生平

雲南附郭之大觀樓中有孫髯所製長聯懸挂已久道光初阮芸臺師總制滇黔時為酌易數字另製聯

板懸之滇人嘖有煩言余曾於前編述之昨接吾師來函云孫髯原聯以正統之漢唐宋元偉烈豐功總

歸一空為主豈不駸駸乎說到我朝故改為曩長蒙會遞到吳三桂等人身上所以扶正而消逆也嘖有

煩言者蒙會未達耳按原聯及改本前編已並全錄今必須重錄改本以質觀者使知吾師所以須改

之故以釋滇人之疑而已改本云五百里滇池奔來眼底憑欄向遠喜茫茫波浪無邊喜茫茫空濶無邊

看東驥金馬西翥碧雞北倚盤龍南馴寶象原本金馬作神駿碧雞作靈儀倚盤龍作走蜿蜒馴寶象作翔縞素高人韻士惜拋流水光陰

原本作何妨趁蠡螭螺洲原本作親將起蒼厓翠壁原本作梳髮更蘋天葦地早收回薄霧殘霞原本作點綴

辜負四圍香稻萬頃鷗沙原本作九夏芙蓉三春楊柳數千年往事注到心頭把酒凌虛歎滾滾英雄誰

在想漢習樓船唐標鐵柱宋揮玉斧元跨草囊原本作斷巖長蒙會原本作偉費盡移山氣力儘珠簾畫棟捲不及

暮雨朝雲便蘇碣苔碑原本作斷都付與荒煙落照原本荒祇贏得幾杵疎鐘半江漁火兩行秋雁一枕

清霜原本作兩行鴻雁一片滄桑

廣西宜山縣為黃山谷先生謫居地城中有山谷祠堂查儉堂撫部守慶遠時重新之並製聯云忠孝振

綱常。黨籍編名。氣節宛如東漢。文章垂宇宙。詩家衍派。門庭別啓西江。公誕辰在六月十二日。李蘭卿權守時。率諸生爲公設祭。如坡公生日故事。祠內舊有寶華亭。墨池諸勝。今已湮廢。蘭卿亦製聯云。載酒爲公來。率儒服儒冠。仍似舊開詩屋宴。僦居無地住。占宜山宜水。卻教長祭墨池田。

福州城外。由江達海之路。以羅星塔爲關鍵。塔據山巔。四面皆波濤洶湧。其由閩縣達長樂。則必以羅星塔山下爲暫泊候潮之所。蓋海潮由此而分也。塔上舊有七字聯。不知何人所撰。其句云。朝朝朝朝朝朝夕。長長長長長長消。過客皆不知所謂。康熙中有一道人到此。讀而喜之。衆請其說。道人笑曰。此山爲海潮來往之區。此聯出語。第一第二朝字。上平聲。第三朝字。下平聲。通作潮字。第四朝字。亦下平聲。第五朝字。上平聲。第六朝字。又下平聲。對語。第一第二長字。平聲。第三長字。上聲。第四長字。是平聲。第五長字。是上聲。第六長字。又是平聲。如此讀之。自不煩言而解。不過是言潮汐長消而已。言訖。道人遂不見。或以爲純陽祖師現身也。

河南輝縣城外。有古百泉。發源蘇門山中。匯爲巨池。詩所謂泉源在左是也。歷代名人。多隱居其上。左有孫夏峯先生祠。程梓庭中丞題聯云。勝地集名儒。軼姚許趙竇。以抗宗傳。羣仰夏峯作喬岳。熙朝開理學。繼濂洛關閩。而昌後裔。從教睢水得淵源。謂姚雪齋。許魯齋。趙復竇。及我朝湯文正公也。

格言

道光癸巳引疾里居。日向街巷舊書攤中。搜求故紙。忽得孫寄圃閣老楹帖一對。閣老手蹟。余所認識。非他手所爲。而筆法腴潤。是作翰林時書。不如後此之蒼勁也。句云。甘守清貧。力行克己。厭觀流俗。奮勉修身。款云。大池年伯大人製句命書。濟甯愚姪孫玉庭。乃知此聯。係爲先大父天池公所作。閣老與先叔父九山公。爲乙未同年。此必係九山公同居館職時。爲先大父索書者。因急購歸。重加裝裱。先代訓言。藉茲不墜。當率拳服膺。如日侍先大人嚴正之容。非僅作墨寶珍皮也。

香祖筆記云。余家自高曾祖父以來。文房正廳。皆置兩素屏。一書心相三十六善。一書陽宅三十六祥。所以垂家訓。示子孫也。又各房正廳一聯云。繼祖宗一脈真傳。克勤克儉。教子孫兩行正路。惟讀惟耕。

余前編聯話。敬載先資政公常書楹帖云。非關因果。方爲善。不計科名。始讀書。此吾鄉習傳之語。不知撰自何人。言極切近可守。渾然無弊。後閱亡友顧南雅。思無邪齋遺集一條云。嘗見陳甸山先生所書楹聯。作不關果報。方行善。豈爲功名始讀書。二語殊未了。古今果報之爽者。十有八九。若此念未忘。其附善機者多矣。至於功名二字。在三不朽之列。正讀書人所當念念不忘者。以爲立功立名之地。此殆誤以科名當之耳。茲爲人書楹帖。特改六字云。必忘果報。能爲善。欲立功名在讀書。其義乃圓云云。其實科名功名。義各有當。未見甸山之必誤也。

謝默卿曰。虎邱山後女墳湖北。風景幽絕。岸旁一古剎。懸一聯於客堂云。乾淨地常來坐坐。太平時早去。

修。語極冷雋。畫舫往來。笙歌鼎沸之外。忽聽此禪窟機鋒。真如暮鼓晨鐘。發人深省。桂林呂月滄。掌秀峯書院。嘗擬題講堂一聯云。先有本而後有文。讀三代兩漢之書。養其根。竦其實。舍希賢莫由希聖。守先正大儒之說。尊所聞。行所知。甫欲製板懸挂。而驟歸道山。其門弟子尙有能述之者。唐陶山家有果克堂。自題聯云。克己最嚴。須從難處去。克爲善必果。勿以小而不爲。彭文勤公有集句堂聯云。立身行道。揚名於後世。夙興夜寐。無忝爾所生。

齊梅麓集詩經語。作宗祠聯云。凡今之人。不如我同姓。聿修厥德。無忝爾所生。又敬思堂聯云。曲禮蔽於無不敬。逸詩刪以未之思。又一長聯云。士恆士。農恆農。工恆工。商恆商。族少閒民。便有興隆景象。父是父。子是子。兄是兄。弟是弟。門無乖氣。方爲孝友人家。

丹徒張伯治巡檢。偕其嘉耦錢蓮。因女史守璞。並以詩畫擅名。論畫則伯治爲精。論詩則蓮因尤健。粵西邊瘠之區。蓮因間關隨宦。能相其夫。甘於末秩。不以富貴利達薰其心。不愧女士之目。嘗因伯治豪飲健談。爲手書楹帖於座右云。人生惟酒色機關。須百鍊此身成鐵漢。世上有是非門戶。要三緘其口學金人。以閨媛能爲此格言。真不愧女士也。

揚州馬氏小玲瓏山館中。有鄭板橋所撰楹帖云。敲定幾句有用書。可忘飲食。養成數竿新生竹。直似兒孫。以八分書之。極奇偉。後歸淮商黃姓。始擬撤去。復有愛其文義者。乃力勸留存。

黔中巡撫署齋。有顏惺甫檢手題一聯云。兩袖入清風。靜憶此生宦況。一庭來好月。朗同吾輩心期。殊有理趣。而措詞蘊藉。不涉腐氣。故佳。

漢口有同善堂。所以施惠。新立規制。冀垂久遠。邑人乞朱蘭坡聯句。題云。同德卽同心。從教救病噓枯體。天意好生而布惠。善終如善始。願得提綱挈領。遵聖言思。永以圖功。又銅陵大通鎮設救生船。亦爲其局中製聯云。博愛之謂仁。當知拯難扶顛。愷惻常同施補救。見險而能止。但願風帆浪舶。倉皇轉得報平安。太傅朱文正師。視學浙中時。因原籍紹興。特榜其門楹曰。鐵面無私。凡涉科場。親戚年家。須諒我。鏡心普照。但憑文字。平奇濃淡。不窺渠。

姚文僖公文田督學時。每試院輒題一聯云。科場舞弊。皆有常刑。告小人毋櫻法網。平生關節。不通一字。誠諸生勿聽浮言。又自撰堂聯云。世上幾百年舊家。無非積德。天下第一件好事。還是讀書。語皆近質。而實足以訓俗。

張蘭渚先生喜書格言爲楹帖。爲閩撫時。嘗屬余書一長聯云。戒之在鬪。戒之在色。戒之在得。職思其居。職思其外。職思其憂。或疑先生此時。何以尙須戒鬪。余曰。聖賢言語。徹上徹下。可以自警。可以警人。且聖人所謂鬪。豈必在角觜力。逞戈矛。凡口給禦人。文字抵觸。皆與鬪無異。居高位者。尤宜慎之。庶不招尤。不債事耳。

張仲甫中翰應昌。蘭渚先生哲嗣也。最恪謹守家法。近手錄先生所集經語楹聯見寄。如云有忍乃有濟。無愛卽無愛。上句出尙書。下句則四十二章經中語也。又一聯云。洗心曰齋。防患曰戒。循法無過。修禮無邪。上句出易繫辭注。下句則戰國策中語也。

張仲甫齋中。亦有自撰聯句云。貪嗔癡卽君子三戒。戒定慧通聖經五言。自注卽定靜安慮得。此以釋語爲儒書注脚也。又一聯云。陰陽風雨晦明。受之以節。夢幻露電泡影。作如是觀。此湊合左氏傳周易語。以對佛經也。蓋仍是蘭渚先生家法。又有一聯云。掃地焚香。清福已具。粗衣淡飯。樂天不憂。則純是儒家語也。

萬廉山郡丞承紀。嘗製大篆一聯見贈云。仁仁義宜。以制其行。經經緯史。乃成斯文。見者皆以爲寫作俱工。余嘗入其書室。讀其自集子部語作篆聯云。凡避嫌者內不足。有爭氣者無與辨。是極好格言。賀耦庚盛喜之。惜其字句未能勻稱。平仄亦尙未諧耳。

黎淇溪河帥。喜拈要辦事。莫生事。要任怨。莫斂怨。四語。嘗請節相孫季圃公作對語。公應之曰。可興利。毋近利。可急功。毋喜功。藥石之言。正河帥所宜省勉也。河帥卽屬陳曼生郡丞。分書爲聯。懸之署齋。客位云。黃石原曰。有客贈聯云。每思於物有濟。常愧爲人所容。又云。似病始知求藥誤。衰年方悔讀書遲。又云。過如新竹。芟難盡。學似春潮。長不高。皆格言中雋語。

花曉亭曰。有贈宣刺史奕一聯云。辦事人多能事少。愛民心易治民難。下七字。獨沈著有味。真格言也。今

人但從事其易者。已爲好官耳。又一聯云。凡事總求過得去。此心先要放平來。亦言淺意深。可銘座右。朱蘭坡家塾中。有培風閣。自題聯云。仿君子懋修。志無怠。功無荒。箴游觀。所其無逸。求古人陳迹。經有程。史有課。譬稼穡。乃亦有秋。又有志勤堂聯云。士所尙在志。行遠登高。萬里鵬程。關學問。業必精於勤。博聞強識。三餘蛾術。惜光陰。字字沈實。足以型家矣。

林少穆自題廳事一聯云。海納百川。有容乃大。壁立千仞。無欲則剛。名臣風矩。惟其有之。是以似之。接近見一廳事。有書此十六字爲聯。而兩句乃上下互乙。遂以對語爲出語。其意則同。但不應掩其名而用其句耳。

少穆卸兩廣督篆後。有引疾歸田之意。嘗豫撰書樓一聯云。坐臥一樓間。因病得閒。如此散材。天或恕。結交千載上。過時爲學。庶幾炳燭。老猶明。寄書囑余爲作隸字。余謂此願未易酬。且俟他日把臂入山時。再了此案可矣。

孫寄圃節相玉庭。由湖北布政使入覲睿廟。有爲守兼優之諭。公於大堂做題楹聯云。領三楚雄藩。來句來宣。問何以推心赤子。承九重懿訓。有爲有守。要無慚對面青山。

余陳臬山左。薦泰安令徐樹人宗幹爲卓異。聞其所至有政聲。其宰武城時。遇歲歉。頻年緩征。又以病乞假。手製一聯懸之廳事云。惟貧病相兼。乃稱寒士。並錢漕不取。纔算清官。復聞其宰任城楹聯云。老吏何

能。有訟不如無訟好。小民易化。善人終比惡人多。皆可以勸。

陳家相明府桂齡。爲河南襄城令時。建汜川書院。費耕亭太守庚吉聯云。聞使君講院新開。說禮敦詩。名相風流推後起。願諸生賢關早闢。讀書論道。大儒理學有真傳。蓋明府爲桂林陳文恭公後裔也。

嚴問樵曰。余宰棲霞。每奉家君子手諭。諄諄以立身居官爲勗。蒙賜一聯云。職在地方。但無忘該管地方。卽爲盡職。民呼父母。倘難對自家父母。何以臨民。庸受而謹書之。懸之廳事。朝夕自勉。因復推廣其意。撰聯書於堂楹云。暗室中自有鬼神。倘鑒余少昧天良。甘爲一錢誓死。公堂上誰非父母。最憐爾難寬國法。苦從三木求生。又曰。有一縣令自題其訟堂云。有一日閑。且種汝地。無十分屈。莫入吾門。亦書一聯懸之。

